

ዮሀንሳ ቆንጮላ ጋላ ቆፋ

ዮሀንሳ ቆንጮላይ ፃፊቲዳይ፣ አማኒያ አሳይ ዩሱስ ኪሪስቶስ ባንታው ጎዳ ኦሊዲ፣ ጌሻቴላን ዳዒዳ ጊሾ ኤንታ ማቶይኔ ዋይይ ጋኪዳ ዋይይ። ፃፊይ ወዲዲ ጌሊዳ አይፌ ቆፋይ፣ አማኒያ አሳ ኡፋይሳይ ኩሜሊ ጊዳና ሜላ ኤንታ ሚንሌሊድ፣ ኤንታ ጋኪዳ ጎዳኔ ሜቱዋ ጊደን ባንታ አማኑዋን ሚኒዲ ኤቃና ሜላ ዴንሌላናሳ።

ማፃፋን ዳሪያ ኪፊሌይ ዳሮኔ ካሊ ካሊዲ ቆንጪዳ ቆንጮላ ኦይኬስ። ሃ ቆንጮላቲ ሄ ዋዴ ዳዒያ አሳስ ጌሌስ፣ ሺን ሃራታስ ፀራ ጊዲዲ ጋሞዒስ። ኤንቲ ኦዴቲዳይካ ሌሚሶ ኦዳና። ሃ ማፃፋን ዳዒያ ታይቦቲ፣ ማካ ሚሼቲኔ ደዓቲ ዳሬታኔ አያና ሜዴቲላታ ሌሚሶ። ማዘሙራ አዝማቹይ ሲሚ ሲሚዲ ዩፀቴይሳዳ፣ ሄ ማፃፋን ዳዒያ ሁዔ ቆፋቲ ዲማ ዲማ ቆንጮላታ ባጋራ ዲማ ዲማ ኦጌን ሲሚ ሲሚ ሸቂዶሶና። ሃ ማፃፋ ቢርሼላስ ዲማ ዲማ ቆፋይ ዳዒኮካ፣ ኢያው ሁዔ ቆፋይ ቆንጮ። ሄሲካ፣ «ፆሳይ ጎዳ ኪሪስቶስ ባጋራ ዛሬላና ኦጌን ባ ሞርኬታ፣ ፃላሄራ ጉጂዲ፣ ኢሲ ቶሆኔ ወርሴሊ ጋካናው ያናና። ሄ ያኑዋፔ ጉዬ፣ ኢያው አማኔቲዲ ዳዒዳ ባ ባጋታ ኦራላ ሳሎኔ ኦራላ ሳዓ አንጀ ላቲሳና» ያጌይሳ።

ዮሀንሳ ቆንጮላ አይፌ ቆፋታ

- ጌሎ ቆፋ 1:1-8
- ዩሱሲ ላፑን ዋሳ ኬላታ ጊደን 1:9-20
- ላፑን ዋሳ ኬላታስ ፃፊቲዳ ኪታ 2:1-3:22
- ኦራታ፣ ፃላ ማፃፋኔ ዶርሳ 4:1-5:14
- ላፑን ማታሚታ 6:1-8:1
- ላፑን ሞይዜታ 8:2-11:19
- ዳዒያኔ ናምዑ ደዓታ 12:1-13:18
- ዲማ ዲማ ቆንጮላታ 14:1-15:8
- ላፑን ሃንቆ ፀዓታ 16:1-21
- ባቢሎኔ ኩንዳላ፣ ደዓኔ ዋርዶ ናቢያ 17:1-20:10
- ወርሴላ ፒርዳ 20:11-15
- ኦራላ ሳሎ፣ ኦራላ ሳዓኔ ኦራላ ዩሩሳላሜ 21:1-22:5
- ኩሻ ቆፋ 22:6-21

1 ኤሶን ሃናናው ደዲያባ ባ አይሌታ ቤሳና ሜላ ያሳይ ኢያው ኢሚዳ ዩሱስ ኪሪስቶሳ ቆንጮፋይ ሃይሳ። ዩሱሲ ባ ኪታንቸዋ ኪቲዲ፣ ባ አይሌያ የሃኒሳስ ቆንጮሲሲ።

2 የሃኒሲ ያሳ ኪታ፣ ዩሱስ ኪሪስቶሲ ኦሊዳባኔ ኦዲዳባ ኡባ ማርካቲሰ።

3 ሃ ኡባይ ሃናናው ዋዴይ ማቲዳ ጊሾ ሃ ቲንቢቲ ቃላ ናባቢያ ኦኒካ ኦንጃቲዳይሳ፤ ቃሲ ሃ ቃላ ሲዔይሳቲኔ ፃፊቲዳ ኪታ ናጊያ ኡባይ ኦንጃቲዳይሳታ።

ላፑን ኢሲያ ዋሳ ኬላታስ ኪቲቲዳ ሳሮፋ

4-5 ሃ ዳብዳቤይ፣ የሃኒሳፕ፣ ኢሲያ ቢታን ደዲያ ላፑን ዋሳ ኬላታስ ፃፊቲሰ። ካሴካ፣ ሃዒካ ደዲያ፣ ሲንሳፊካ ያናው ደዲያ ያሳፊ፣ ቃሲ ኢያ ኦሪታ ሲንሳን ደዲያ ላፑን ኦያናታፕ፣ ሄሳዳካ፣ ሃይቆፕ ዴንዶን ኮይሮ ጊዲዳይሳፊ፣ ሳባ ካዋታ ሃሪያ ኦማኔቲያ ማርካ ጊዲዳ ዩሱስ ኪሪስቶሳፕ፣ ኦጾ ኬሃቴላይኔ ሳርቴላይ ሂንቲው ጊዶ።

ዩሱሲ ኦና ሲቄስ፣ ቃሲ ባ ሱላን ናጋራ አይሌቴላፊ ኦና ላባ ኬሲሰ።

6 ኦኒ ያሳ ኢያ ኦዋስ ኦላና ሜላ ኦና ካዋቴላ ካሂኔ ኦሊሰ። ኢያው ሜሪናፕ ሜሪና ጋካናው ቦንቸይኔ ዋልቃይ ጊዶ። ኦሚንዒ።

7 ሄኮ፣ ዩሱሲ ሻራራ ዩሰ። ኦሳ ኡባይ ሃሪ ኦቶሺን፣ ኢያ ጫዲዳ አሳይካ ኢያ ቤዓና። ሳባን ደዲያ ኦሳ ኡባይ ኢያ ጊሾ ዩካና። ሄሲ ቱማ ሃናና! ኦሚንዒ።

8 «ካሴካ፣ ሃዒካ ደዲያሲ፣ ሲንሳፊካ ያና ጎዳይ፣ ኡባፊ ዋልቃማ ያሳይ፣ ኦልፋኔ ኦሜጊ ታና» * ያጌስ ጎዳ ያሳይ።

ጎዳ ቆንጮፋ

9 ታኒ፣ የሃኒሲ፣ ሂንቲ ኢሻይ፣ ሂንቲራ ኢሲፊ ዩሱሳን ዋያ፣ ኢያ ካዋቴላኔ ኢያ ዳንዳባ ቤዓሰ። ታኒ ያሳ ቃላ ጊሾኔ ዩሱሳባ ማርካቲዳ ጊሾ ፓዲዋ ጊያ ሃላን ቱቄቲዳ ቢታን ደዳይሰ።

10 ጎዳ ጋላሳን ታ ጌሻ ኦያናን ሃሪታዳ ደዳይሰ፤ ታፕ ጉዬራ ዋይዜ ፑኖ ሜላ ጊታ ጊርሲ ሲዓሰ።

1:4-5 ኬሳ 3:14፤ ዮቆ 4:5 1:4-5 ኢሳ 55:4፤ ማዝ 89:27 1:6 ኬሳ 19:6፤ ዮቆ 5:10 1:7 ዳኔ 7:13፤ ማቶ 24:30፤ ማር 13:26፤ ሉቃ 21:27፤ 1ቴሴ 4:17፤ ዛካ 12:10፤ ዮሃ 19:34 * 1:8 ኦልፋኔ ኦሜጊ፣ ገሪኬ ዶናን ኦልፋኔ ኦሜጊ ኮይሮኔ ወርሴላ ፒዳሌታ፤ ቢርሼላይካ ኮይሮኔ ወርሴላ ጉሱ። 1:8 ዮቆ 22:13፤ ኬሳ 3:14

11 ሄ ገርሳይ ታና፡ «ኔ በዔይሳ ማፃፋን ፃፋዳ፡ ኢሲያን ዳዒያ ላፑን ዋሳ ከላታስ፡ ኤፌሶና፡ ሳሚርኔሳ፡ ጴርጋሞና፡ ቲያቲርና፡ ሳርዴሳ፡ ፊላዴላፊያኔ ሎዶቂያ ዬዳ» ያገሰ።

12 ታኒ ታው ኦዲያ ገርሳ በዓናው ጉዬ ሲማዳ ያምፔ ዋሊያ ላፑን ዋርቃ ኮጫታ በዓሰ።

13 ሄ ኮጫታ ገደን እሳ ናዓ ዳኔይሳ በዓሰ። ኢ ኣዲሳ ኣፊላ ባ ቶሁዋ ጋሊ ማዒስ፡ ዋርቃ ዳንጮን ባ ቲራ ዳንጨሰ።

14 ኢያ ሁዔይኔ ኢያ ቢናናይ ቦላ ዶርሳ ኢኪሴ ሜላ ዋይኮ ሻቻ ሜላ ቦሊ፤ ኢያ ኣይፊይ ታማ ላጮ ዳኔስ።

15 ኢያ ቶሆይ ታማን ሴሪዲ ዘዒዳ ናሴ ቢራታ ዳኔስ፤ ኢያ ገርሳይካ ገታ ሻፋ ኮሺንቻ ሜላ።

16 ኢ ባ ኡሻቻ ኮሺን ላፑን ያለንቶታ ኦይኪስ። ኢያ ዶናፔ ናምቡ ባጋራ ቃራቲዳ ማሺ ከዬስ። ኢያ ሶምዖይ ሴታ ጋላሳ ኣዋ ኣይፊ ዳኔስ።

17 ታኒ ኢያ በዒዳ ዋዴ ሃይቂዳ ኣሳዳ ሃናዳ ኢያ ቶሁዋ ማታን ኮንዳስ። ኢ ባ ኡሻቻ ኮሺያ ታ ቦላ ዋሊዲ፡ «ያዮፋ፤ ኮይሮይ ወርሴላይ ታና።

18 ታኒ ዳዖን ዳዓይስ፤ ታኒ ሃይቃስ፡ ሺን ሄኮ ሜሪ ሜሪናዉካ ዳዖን ዳዓይስ። ሃይቆኔ ሲዖሌ ቁልፔይ ታ ኮሺና።

19 ሂዛ፡ ሃዒ ሃኒያባኔ ሲንላፊ ሃናናባ ኔ በዒዳባ ፃፋ።

20 ኔኒ ታ ኡሻቻ ኮሺን በዒዳ ላፑን ያለንቶታኔ ላፑን ዋርቃ ኮጫታ ቢርሺላይ ሃይሳ፡ ላፑን ያለንቶቲ ላፑን ዋሳ ከላታ ኪታንቸታ፤ ላፑን ዋርቃ ኮጫቲ ላፑን ዋሳ ከላታ።»

2

ኤፌሶና ዋሳ ከላስ ኪቲቲዳ ኪታ

1 «ኤፌሶና ዋሳ ከላ ኪታንቸቸቸሰ ሃይሳዳ ያጋዳ ፃፋ።
ባ ኡሻቻ ኮሺን ላፑን ያለንቶታ ኦይኪዳይሲኔ ላፑን ዋርቃ ኮጫታ ገደራ ሃሙቲይሲ ሃይሳዳ ያገሰ።

2 ታኒ ኔ ኦሱዋ፡ ኔ ዳቡራኔ ኔ ጌንጫ ኤራይስ። ኔኒ ኢታ ኣሳታባ ጌንጫናው ዳንዳባባናይሳ ኤራይስ። ቃሲ ሃዋሬ ገደናሺን ባንታና፡ ሃዋሬ ጌይሳታ ፒልጋ ኤራዳ ኤንቲ ዋርዳንቸ ገዴይሳ ዴሚዳይሳ ታ ኤራይስ።

1:13 ዳኔ 7:13፤ ዳኔ 10:5 1:14 ዳኔ 7:9 1:14 ዳኔ 10:6 1:15 ሂዝ 1:24፤ 43:2 1:17 ኢሳ 44:6፤ 48:12፤ ዮ.ቆ 2:8፤ 22:13

- 3 ኔኒ ገንጫዳሳ፤ ታ ሱንላ ገሾ ማቶ ዳንዳዳዳ፤ ያኔታባካ።
- 4 ገደሺን፣ ሃዒ ታ ኔና ቦሪያባይ ዳዔስ፤ ሄሲካ ኔኒ ካሴ ኔ ሲቁዋ ኣጋዳሳ።
- 5 ሂዛ፣ ኔ ኣይ ማላ ጶቃ ቤሳፌ ኩንዲዳኮ ኣኬካ! ኔ ናጋራፔ ሲማ፤ ኔኒ ካሴ ኦሊያ ኦሱዋ ኦላ። ኔኒ ኔ ናጋራፔ ሲሞና ኢዳኮ፣ ኔ ያሞፔ ዋሊያ ኮጫ ኢያ ቤሳፌ ኤካና።
- 6 ሃዒ ታ ኔና ናሺያ ኢሲባይ ዳዔስ፤ ታ ኢዳያ ኒቆላዌታ ኦሱዋ ኔካ ኢዳዳሳ።
- 7 ጌሻ ኣያናይ ዋሳ ኬላታሰ ጊያባ ሲዓናው ሃይሊ ዳዒያ ኦኒካ ሲዮ። ያኒያ ኦኒካ ያሳ ጋናቲያን ዳዒያ ዳዮ ሚሴ ኣይፌፔ ማና ማላ ማታ ኢማና።

ሳሚርኔሳ ዋሳ ኬላሰ ከቲቲዳ ኪታ

- 8 «ሳሚርኔሳ ዋሳ ኬላ ኪታንቹዋሰ ሃይሳዳ ያጋዳ ዓፋ። ኮይሮይኔ ወርሴላይ፣ ሃይቁዳይሲኔ ሃይቆፔ ዳንዲዳይሲ ሃይሳዳ ያጌሰ።
- 9 ታኒ ኔ ዋያኔ ኔ ማንቆቴላ ኤራይሰ፤ ገደሺን ኔኒ ዱሬ። ኣይሁዳ ገደናሺን ባንታና ኣይሁዳ ጌይሳቲ ጫያ ጫሻ ታ ኤራይሰ፣ ሺን ኤንቲ ዓላሄ ማባራን ዳዖሶና።
- 10 ኔኒ ኤካናው ዳዒያ ዋያ ባቦፋ። ዓላሄይ ሂንቴፌ ኢሶታ ኢሶታ ፓጫናው ቃሾ ኬላን ዬጋና፤ ታው ጋላሰ ጋካናው ሂንቴ ዋይታና። ሃይቃና ጋካናው ኣማኔቲዳይሳ ገዳ፤ ታ ኔው ዳዮ ካላቻ ኢማና።
- 11 ጌሻ ኣያናይ ዋሳ ኬላታሰ ጊያባ ሲዓናው ሃይሊ ዳዒያ ኦኒካ ሲዮ። ያኒያ ኦኒካ ናሞዓንሎ ሃይቁዋን ቆሄቴና።

ጴርጋሞና ዋሳ ኬላሰ ከቲቲዳ ኪታ

- 12 «ጴርጋሞና ዋሳ ኬላ ኪታንቹዋሰ ሃይሳዳ ያጋዳ ዓፋ። ናሞው ባጋራ ቃራቲዳ ማሺ ዳዔይሲ ሃይሳዳ ያጌሰ።
- 13 ታኒ ኔ ዳዒያ ቤሳ ኤራይሰ፤ ኔኒ ዓላሄ ኣራታይ ዳዒያ ቤሳን ዳዓሳ፤ ታ ሱንላ ሚንላ ናጋዳሳ። ሃሪ ኣቶሺን፣ ዓላሄይ ዳዒያ ሂንቴ ካታማን ሃይቁዳ ታው ኣማኔቲዳ ማርካይ፣ ኣንቲጳሲ፣ ዳዒያ ዋይካ ኣማኑዋ ኣጋባካ።
- 14 ገደሺን፣ ታ ኔና ቦሪያ ጉላባቲ ዳዖሶና። ሄሲካ ኢሰራዔሌ ኣሳይ ኤቃሰ ያርሺቲዳ ካላ ሚዲ ቱናና ማላኔ ላይማቴላ ናጋራ

2:7 ሜጴ 2:9፤ ዮ.ቆ 22:2፤ ሂዝ 28:13፤ 31:8 2:8 ኢሳ 44:6፤ 48:12፤
 ዮ.ቆ 1:17፤ 22:13 2:11 ዮ.ቆ 20:14፤ 21:8

ኦላና ሜላ ባላቃ ታማርሲዳ ባላማ ቲሚርቲያ ኤኪዳ ኢሲ ኢሲ አሳቲ ኔራ ዴዎሶና።

15 ሄሳዳካ፣ ኒቆላዌታ ቲሚርቲያ ታማሪያ አሳቲ ኔራ ዴዎሶና።

16 ሄሳ ጊሾ፣ ኔኒ ኔ ናጋራፔ ሲማ። ሄሲ ሃኖና ኢዲኮ፣ ታ ኔኮ ኤሌሳ ያዳ ሄ አሳታ ታ ዶናፔ ኬያ ማሻን ኦላና።

17 ጌሻ አያናይ ዎሳ ኬላታሰ ጊያባ ሲዳናው ሃይሌ ዴዎያ ኦኒካ ሲዎ። ያኒያ ኦዴሰካ ቆሴቲዲ ዴዎያ ማናፌ * ኢማና። ቃሲ ኤኪያ ኡራፔ ኣቲን ሃራ ኣሲ ኤርና ኦራላ ሱንላይ ፃፌቲዳ ቦላ ሹቻ ታ ኢያው ኢማና።

ቲያቲርና ዎሳ ኬላሰ ኪቲቲዳ ኪታ

18 «ቲያቲርና ዎሳ ኬላ ኪታንቹዎሰ ሃይሳዳ ያጋዳ ፃፋ።

ታማ ላጮ ዳኒያ አይፌይ ዴዎይሲ፣ ቃሲ ታማን ሴሪዳ ናሴ ቢራታ ዳኒያ ቶሆይ ዴዎይሲ፣ ያሳ ናዳይ፣ ሃይሳዳ ያኾሰ።

19 ታኒ ኔ ኦሱዎ፣ ኔ ሲቁዎ፣ ኔ አማኑዎ፣ ኔ ኦሱዎኔ ኔ ጌንጫ ኤራይሰ። ኔኒ ኮይሮ ኦፊይሳፌ ሃራ አላዳ ኦፊይሳካ ኤራይሰ።

20 ጊዶሺን፣ ታ ኔና ቦሪያ ኢሲባይ ዴዎስ፤ ባና ናሴ ጊያ ማጫሲው፣ ኤልዛቤሎ፣ አይኮካ ጋሳካ። ሄ ማጫሲያ ኤቃሰ ያርሼቲዳ ካላ ሚዲ ቱናናዳኔ ላይማታናዳ አላዳ ታ አይሌታ ባሌላሱ።

21 ኢያ ባ ናጋራፔ ሲማና ሜላ ታ ኢው ዎዴ አማሰ፣ ሺን ኢያ ሲማናው ኮያቡኩ።

22 ኤንቲ ኢ ባላ ኦጊያፔ ሲሞና ኢዲኮ፣ ታ ኢዮ ኢታ ሃርጌን ዬጋና፤ ኢራ ላይማቲይሳቲካ ኢታ ዎዬ ዎዬታና።

23 ታኒ ኢ ናይታ ዎጳና፤ ቃሲ ዎሳ ኬላ ኡባይ ታ አሳ ቆፋኔ አሳ ዎዛና ኤሬይሳ ጊዴይሳ ኤራና። ታ ኢሱዎሰ ኢሱዎሰ ሂንቲ ኦሱዎዳ ኢሱዎዳ ኢማና።

24 ሺን ቲያቲርናን ዴዎያ ሃራታ፣ ሄ ኢታ ቲሚርቲያ ኤኪቦናይሳታኔ፣ «ፃላሄ ጊታ ፀራ» ጌቲቲያ ሃ ቲሚርቲያ ታማሪቦና ሂንቲና ሃራ ዴዎ ቶሆ ቶሲኬ።

25 ጊዶሺን፣ ታ ያና ጋካናው ሂንቲው ዴዎያባ ሚንሌ ናጊቲ።

26 ያኔይሳሲኔ ዉርሴሌ ጋካናው ታው ኪቲቲያ ኦዴሰካ ካዎቲላታ ሃራና ሜላ ማታ ኢማና።

27 ሲኢ ኤንታ ቢራታ ፃሞዳን ሃራና፤

2:14 ታይ 22:5 * 2:17 ማና፣ ኢሰራዔሌ አሳይ ባዞ ቢታን ሃሙቲያ ዎዴ ሳሎፔ ሳሳይ ኤንታው አሚዳ ዳማ ካሌ ዎይኮ ኪታንቹ ካሌ። 2:17 ኬሳ 16:14 2:20 1ካዎ 16:31፤ 2ካዎ 9:22 2:23 ማዝ 7:9፤ ኤር 17:10፤ ማዝ 62:12 2:26 ማዝ 2:8-9

ሜቃ ሚሹዳካ ሜንጴሬላና።
 ሄ ማታይ ታኒ ታ አዋፔ ኤኪዳ ማታ ሜላ።
 28 ቃሲ ታ ኢያው ባካላ ያለንቶ ኢማና።
 29 ጌሻ አያናይ ዋሳ ኬላታሰ ጊያባ ሲዒያ ሃይሉ ዳዒያ ኦኒካ ሲዖ።

3

ሳርዴሳ ዋሳ ኬላሰ ኪቴቴዳ ኪታ

1 «ሳርዴሳ ዋሳ ኬላ ኪታንቹዋሰ ሃይሳዳ ያጋዳ ዓፋ።
 ላፑን ያሳ አያናታኔ ላፑን ያለንቶታ ኦይኪዳይሲ ሃይሳዳ ያጌሰ። ታኒ ኔ ኦሱዋ ኤራይሰ፤ አሲ ኔና ፓፃ ዳዒሰ ጊኮካ፣ ኔ ሃይቃዳሳ።
 2 ባርካ! ጉላ አቲዳባኔ ሃይቃናው ማቲዳባ ሚንላ። ኔ ኦሶይ ያሳ ሲንላን ፖሎ ጊዳናይሳ ዳማሰ።
 3 ሂዛ፣ ኔ ኤኪዳባኔ ሲዒዳባ አኬካ፤ ናጋ፤ ኔ ናጋራፔ ሲማ። ኔኒ ባርኮና ኢጃኮ ታ ካይሶዳ ያና፤ ታ አይ ዋዴ ያኔኮ ኔ ኤራካ።
 4 ሺን ባንታ ማዑዋ ቂታዮና ጉላ አሳቲ ሳርዴሳን ዳዖሶና። ኤንታው ቤሲያባ ጊዲያ ጊሾ ቦላ ማዖ ማዒዲ ታራ ሃውታና።
 5 ያኒያ ኦኒካ ኤንታይሳዳ ቦላ ማዖ ማዓና። ታኒ ኢያ ሱንላ ዳዖ ማፃፋፔ ቁቸኬ። ታኒ ታ አዋ ሲንላኒ ኢያ ኪታንቹታ ሲንላን ኢ ታባ ጊዴይሳ ማርካታና።
 6 ጌሻ አያናይ ዋሳ ኬላታሰ ጊያባ ሲዒያ ሃይሉ ዳዒያ ኦኒካ ሲዖ።

ፊላዴልፊያ ዋሳ ኬላሰ ኪቴቴዳ ኪታ

7 «ፊላዴልፊያ ዋሳ ኬላ ኪታንቹዋሰ ሃይሳዳ ያጋዳ ዓፋ።
 ጌሻይኔ ቱማንቸይ፣ ዳዋቲ ቁልፒያ ባ ኩሺን ኦይኪዳይሲ፣ ሃይሳዳ ያጌሰ። ኢ ጎርዲን ኦኒካ ደያናው ዳንዳዔና፤ ቃሲ ኢ ደዪን ኦኒካ ጎርዳናው ዳንዳዔና።
 8 ታኒ ኔ ኦሱዋ ኤራሰ፤ ሄኮ ታ ኔ ሲንላን ኦኒካ ጎርዳናው ዳንዳዖና ደያ ፔንጌ ዋላሰ። ኔ ዋልቃይ ጉላ ጊዲኮካ፣ ታ ቃላ ናጋዳሳ፤ ታና ካዳባካ።

3:3 ማቶ 24:43 3:5 ኬሳ 32:32 3:7 ኢሳ 22:22፤ ኢዮ 12:14

9 አይሁዴ ጊደናሺን ባንታና አይሁዴ ጊያ ዋርዶታኔ ፃላሄ ባጋታ ኔኮ ኤሃናኔ ኔ ሲንላን ጉልባቲሳና። ታ ኔና ደሴይሳ ኤንታና ኤሪሳና።

10 ኔኒ፣ ገንጫ) ጋዳ ታ ኪቲዳ ኪታ ናጊዳ ጊሾ ኩሜላ አላሚያ ፓጫናው ያ ዋዬ ዋዲያፔ ታኒ ኔና ናጋና።

11 ታኒ ኤሌሳዳ ያና፤ አኒካ ኔ ካላቻ ኤኮና ሜላ ኔው ዴዲያባ ሚንላዳ ኦይካ።

12 ያኒዲይሳ ታ ያሳ ኬላን ቱሱ ኦላና፤ ኢ ያን ሜሪናው ደና። ታኒ ታ ያሳ ሱንላኔ ታ ያሳ ካታማ ሱንላ ኢያ ቦላ ፃፋና፤ ኢያካ ታ ያሳ ማታፔ ዋዲያ ኦራላ ዩሩሳላሜ። ቃሲ ታ ታ ኦራላ ሱንላካ ኢ ቦላ ፃፋና።

13 ጌሻ አያናይ ዋሳ ኬላታስ ጊያባ ሲዲያ ሃይሌ ዴዲያ አኒካ ሲዮ።

ሎዶቂያ ዋሳ ኬላስ ኪቲቲዳ ኪታ

14 «ሎዶቂያ ዋሳ ኬላ ኪታንቹዋስ ሃይሳዳ ያጋዳ ፃፋ።

(አሚንዒ) ጊዲዳ አማኔቲዳ ቱማ ማርካይ፣ ያሳ ሜዴቲላ ሃራይሲ ሃይሳዳ ያጌስ።

15 ታኒ ኔ ኦሱዋ ኡባ ኤራይስ፤ ኔኒ ኢርፃ ዋይኮ ሚሻ ጊዳካ፤ ኔኒ ናሞዓፌ ኢሱዋ ጊዲኮ ሎዮ!

16 ኔኒ ኢርፃ ዋይኮ ሚሻ ጊደናሺን ቦልዖ ጊዲያ ጊሾ ታ ኔና ታ ደናፔ ጩታና ሃናይስ።

17 ሂዛ፣ ኔኒ፣ ሩሬ፣ ሻሎራ ዴዳይስ፣ ታው አይቢባይካ ፓጩቤና) ያጋሳ። ሺን ኔኒ ሜቶታንቾ፣ ማንቆ፣ ቆቄኔ ካሎቲዳ አሲ ጊዳይሳ ኤራካ።

18 ሄሳ ጊሾ፣ ኔ ዲሬታናው ታማን ጌዪዳ ዋርቃ፣ ኔ ዩላ ካሎዋ ካማናው ቦላ ማዖኔ ሎይላ ፃላናው ማዲያ አይፌ ዳሌ ታፔ ሻማና ሜላ ኔና ዞራይስ።

19 ታ ደሴይሳ ሴራይሲኔ ሃንቃይስ፤ ሂዛ ሚና፤ ኔ ናጋራፔ ሲማ።

20 ሄኮ፣ ታ ካሬን ኤቃዳ ጃጋይስ። አኒካ ታ ጃሳ ሲዲዲ፣ ዉላ ደዩኮ፣ ኢያኮ ጌላና፤ ኢያራ ኢሲፌ ካሌ ማና፤ ኢካ ታራ ኢሲፌ ማና።

21 ታ ያናዳ ታ አዋራ ኢያ አራታን ኡቲዳይሳዳ ያኒዲይ ታራ ታ አራታን ኡታና ሜላ ማታ ኢማና።

3:9 እሳ 49:23፤ 60:14፤ እሳ 43:4 3:12 ዮ.ቆ 21:2፤ እሳ 62:2፤ 65:15
3:14 ሎሚ 8:22 3:19 ሎሚ 3:12፤ ኢብ 12:6

22 ጌሻ አያናይ ዋሳ ኬላታስ ጊያባ ሲሲያ ሃይሊ ዴዬይ ኦኒካ ሲያ» ያገረጸ።

4

ሳሎን ዴሲያ ጎይኖ ዎጋ

1 ሃሳፌ ጉዬ፣ ታኒ ሳሎ ያሊያ ዎዴ ዶዬቲዳ ፔንጌ ቤዓስ። ቃሲ ታ ካሴ ሲሲዳ ሞይዜ ገርሳ ማላይ ታኮ፣ «ሃ ኬያ፤ ሃይሳፌ ጉዬ፣ ሃናናው ዴሲያባ ታ ኔና ቤሳና» ያገረጸ።

2 ሄ ዎዴ ታ አያናን ሃሬታዳ ዴዓይሰ። ሄኮ፣ ሳሎዋን አራታ ቦላ ኢሶይ ኡቲዳይሳ ቤዓስ።

3 ሄ ኡቲዳይሳ ማላይ ኢያሰጾዴይ ሳርዲዮና ጊያ አልዎ ሹቻ ማላ። ኢያ አራታ ዩሹዋን አልዎ ሹቹ ዳኒያ ዙላይ ዴዔስ።

4 ሄ አራታ ዩሹዋን ላታማኔ ኦይዱ አራታቲ ዴዎሶና፤ ኤንታ ቦላ ቦላ ማዎ ማዒዲ፣ ሁዔን ዎርቃ ካላቻ ዎሊዳ ላታማኔ ኦይዱ ጨማቲ ኡቲዳሶና።

5 አራታፔ ዎልዓንሉ፣ ጉንሊኔ ዴሾይ ኬዬስ። አራታ ሲንላን ላፑን ፖሲያ ዎሞፔቲ ዴዎሶና፤ ኤንቲ ላፑን ዎሳ አያናታ።

6 አራታ ሲንላን ቦሪሌ ዳኒያ ጳሊያ ቡርጩኮ አባይ ዴዔስ። ሲንላራኔ ጉዬራ አይፌይ ዴሲያ ኦይዱ ዴዎራ ዴሲያ ማዴቲላቲ አራታ ዩሹዋኒኔ አራታ ጊዳን ዴዎሶና።

7 ኮይሮ ማዴቲላ ማዴይ ጋሞ ዳኔስ፤ ናሞዓንሉይ ቦሪ ዳኔስ፤ ሄሻንሉይ አሴ ዳኔስ፤ ቃሲ ኦይዳንሉይ ፒራዲያ አርጋንሉ ዳኔስ።

8 ኦይዱ ማዴቲላታ ኡባሰ ኡሱፑን ቄፌይ ዴዔስ፤ ኤንታ አሳቲላ ኡባይ አይፌን ኩሚስ። ኤንቲ ቃማኔ ጋላሰ ቃንዎና።

«ጌሻው፣ ጌሻው፣ ጌሻው፣

ጎዳው፣ ኡባፌ ዎልቃማ ዎሳው፣

ካሴካ፣ ሃዒካ ዴዔይሶ፣ ሲንላፌ ያናይሶ»

ያገረጸ።

9 ሄ ማዴቲላቲ አራታን ኡቲዳይሳሲኔ ማሪናው ዴዔይሳሰ ሳባ፣ ቦንቾኔ ጋላታ ኢሚዳ ዎዴ

10 ላታማኔ ኦይዱ ጨማቲ አራታን ኡቲዳይሳኔ ማሪናው ዴዔይሳ ሲንላን ጉፋኒዲ ጎይኒዶሶና፤ ባንታ ካላቻ አራታ ሲንላን ዎሊዲ፣

11 «ኑ ጎዳው፣ ኑ ዎሳው፣

4:2 ሂዝ 1:26-28፤ 10:1 4:5 ኬሳ 19:16፤ ዮ.ቆ 1:4፤ ዮ.ቆ 8:5፤ 11:19፤
16:18፤ ሂዝ 1:13፤ ዛካ 4:2 4:6 ሂዝ 1:22 4:6 ሂዝ 1:5-10፤ 10:14
4:8 ሂዝ 1:18፤ 10:12፤ ኢሳ 6:2

ኔኒ ቦንቾ፣ ሳባኔ ዋልቃ ኤካናው ቤሳሳ።
 ኔኒ ኡባ ሜዳዳሳ፤
 ኡባባይ ኔ ሼኒያዳ ሃኒስ፣ ሜዴቲስ»
 ያጊደሶና።

5

ደርሳይ ፃላ ማፃፋ ዶዩስ

1 ሃሳፌ ጉዬ፣ አራታ ቦላ ኡቲዳይሳ ኡሻቻ ኩሼን ጊዶራኔ ካሬራ ፃፊቲዳ ላቸን ማታሚን ጎርዳቲዳ ፃላ ማፃፋ ቤዓስ።

2 ኢሲ ሚኖ ኪታንቾይ ባ ቃላ ቶቁ ኦሊዲ፣ «ማታሚያ ቢላናውኔ ማፃፋ ዶያናው ቤሴይ ኦኔ?» ያጊዲ አዋጂሺን ቤዓስ።

3 ሺን ሳሎን ጊዲን ሳዓን ዋይኮ ሳዓፔ ጋርሳን ጊዲን ሄ ፃላ ማፃፋ ቢላናውኔ ጊዲዋ ቤዓናው ዳንዳዔይ ኦኒካ ቤንቲቤና።

4 ፃላ ማፃፋ ቢላናውኔ ኢያ ጊዲዋ ቤዓናው ቤሲያ ኦሲ ዳዩዳ ጊሾ ታ ዳር ዩካስ።

5 ያቲን፣ ጨማታፔ ኢሶይ ታኮ፣ «ዬኮፋ! ሃኮ፣ ዩሁዳ ዜሬሊ ጊዲያ ጋሞይ፣ ዳዋቲ ሹሻይ፣ ላቸን ማታሚታ ቢላናውኔ ማፃፋ ዶያናው ዳንዳዔሲ» ያጊስ።

6 ሃሳፌ ጉዬ፣ ሹኩቲዳ ደርሳይ አራታስ፣ ኦይዱ ዴዎን ዴዒያ ሜዴቲላታሲኔ ጨማታስ ጊዲን፣ ኤቁዳይሳ ቤዓስ። ኢያው ላቸን ካጩቲኔ ላቸን ኦይፊቲ ዴዎሶና። ሃሳቲ ሳዓ ኡባ ኪቲቲዳ ያሳ ላቸን ኦያናታ።

7 ሄ ደርሳይ ቢዲ፣ አራታ ቦላ ኡቲዳይሳ ኡሻቻ ኩሼፔ ፃላ ማፃፋ ኤኪስ።

8 ኢ ሄ ፃላ ማፃፋ ኤኪዳ ዋዴ ዴዎን ዴዒያ ኦይዱ ሜዴቲላቲኔ ላታማኔ ኦይዱ ጨማቲ ደርሳ ሲንላን ኩንዲደሶና። ኤንቲ ኢሶይ ኢሶይ ዲሊኔ ጌሻታ ዋሳ ጊዲዳ ኢፃኔይ ኩሚዳ ዋርቃ ሻቲ ኦይኪደሶና።

9 ኤንቲ፣
 «ፃላ ማፃፋ ኤካናው፣
 ማታሚያ ቢላናው ኔው ቤሴስ።

ኦይስ ጊኮ፣ ኔኒ ሹኩታዳሳ፤
 ዜሬሊ ኡባፊ፣ ዲማ ዲማ ደናፔ፣
 ያራታፔኔ ካዋቲላታ ኡባፊ

5:1 ሃዝ 2:9 5:5 ሜዴ 49:9፤ ኢሳ 11:1 5:6 ኢሳ 53:7፤ ዛካ 4:10
 5:8 ማዝ 141:2 5:9 ማዝ 33:3፤ 98:1፤ ኢሳ 42:10

ኔ ሱላን ያሳሰ ወዛዳሳ።
 10 ኤንቲ ኢያ ያሳ አዋሰ ኦላና ማላ
 ኤንታና ካሂኔ ካዎቴሌ ኦላዳሳ።
 ኤንቲካ ቢታ ኡባ ሃራና»
 ያጊዲ ኦራላ ማዝሙሪ ዩዲዳሶና።

11 ታ ቤዒያ ዎዴ ሙኩሉ ቶሆ ሙኩሉኔ ታሙ ሙኩሉ ቶሆ
 ታሙ ሙኩሉ ጊዲያ ኪታንቸታ ጊርሳ ሲዓሰ። ኤንቲካ አራታ፥
 ኦይዱ ዴዎን ዴዒያ ማዴቴላታኔ፥ ጨማታ ዩሹዋን ኤቂዳሶና።

12 ሄ ኪታንቸቲ ቶቁ ጊዳ ቃላን፥
 «ሹከቲዳ ደርሳይ ዎልቃ፥ ዱሬቴሌ፥
 ጨንጫቴሌኔ ሚኖቴሌ፥
 ቦንቸ፥ ሳባኔ ጋላታ ኤካናው ቤሴሰ»
 ያጊዳሶና።

13 ሄሳፌ ጉዬ፥ ሳዓን፥ ሳሎን፥ ሳዓፔ ጋርሳኒኔ አባ ጊደን ዴዒያ
 ማዴቴሌ ኡባይ፥
 «አራታ ቦላ ኡቲዳይሳሲኔ ደርሳሰ፥
 ጋላታይ፥ ቦንቸይ፥ ሳባይኔ ዎልቃይ
 ማሪ ማሪናው ጊደ»
 ያጊዲ ዩዲሺን ሲዓሰ።

14 ኦይዱ ዴዎን ዴዒያ ማዴቴላታ፥ «አሚንዒ» ያጊዳሶና፤
 ቃሲ ጨማቲ ጉፋኒዲ ሳይኒዳሶና።

6

ማታሚያ ደዬቴላ

1 ደርሳይ ላፑን ማታሚያፔ ኢሱዋ ደዩሺን ቤዓሰ። ቃሲ
 ኦይዱ ዴዎን ዴዒያ ማዴቴላታፔ ኢሶይ፥ ዳዳ ዴሾ ጊርሳን፥
 «ሃያ!» ያጊሺን ሲዓሰ።

2 ሄኮ ቦላ ፓራ ቤዓሰ። ሄ ፓራ ቶጊዳሲ ደንጌ ኦይኪሰ፤ ኢያ
 ሁዔን ካላቺ ዴዔሰ። ኢካ ያኒሼ ያናናው ከዪሰ።

3 ቃሲ ደርሳይ ናሞዓንሶ ማታሚያ ደዩዳ ዎዴ ዴዎን ዴዒያ
 ናሞዓንሶ ማዴቴላይ፥ «ሃያ!» ያጊሺን ሲዓሰ።

4 ቃሲ ሃራ ሲሃ ዘዎ ፓራ ከዪሰ። ሄ ፓራ ቶጊዳይሳሰ ሳዓፔ
 ሳር ሳይሳና ማላኔ አሳይ ዎሊ ዉርሳና ማላ ማቲኔ ጌታ ማሺ
 ኢሜቲሰ።

5:10 ከሳ 19:6፤ የ.ቆ 1:6 5:11 ዳኔ 7:10 6:2 ዛካ 1:7 6:4 ዛካ 1:7

5 ደርሳይ ሄቫንሶ ማታሚያ ደዪዳ ዎዴ ዴዎን ዴዒያ ሄቫንሶ ሜዴቴላይ፡ «ሃያ!» ያጊሺን ሲዓሰ። ሄኮ ካሬላ ፓራ ቤዓሰ፤ ኢካ ባ ኩሺን ሚዛኔ ኦይኪሰ።

6 ኦይዲ ዴዎን ዴዒያ ሜዴቴላታ ጊደፌ፡ «ኢሲ ጋላሳ ኦሶሰ ዳሞዜ፡ ባጋ ኪሎ ጊሰቴ፤ ቃሲ ኢሲ ጋላሳ ኦሶሰ ዳሞዜ፡ ኢሲ ኪሎኔ ባጋ ባንጋ ጊደ። ሺን ዛይቴያኔ ዎይኒያ ቆሆፓ» ያጊሺን ሲዓሰ።

7 ደርሳይ ኦይዲንሶ ማታሚያ ደዪዳ ዎዴ ኦይዲንሶ ዴዎን ዴዒያ ሜዴቴላይ፡ «ሃያ!» ያጊሺን ሲዓሰ።

8 ሄኮ ዋንጮ ፓራ ቤዓሰ። ሄ ፓራ ቶጊዲይሳ ሱንላይ ሃይቆ፤ ኢያ ጌዶ ሲዎሌይ ካሌሰ። ኤንታው ኣላሜፔ ኦይዲንሶ ኩሺያ ኦላን፡ ኮሻን፡ ጋደኒኔ ደዓን ዎዲሳና ሜላ ማቲ ኢሜቲሰ።

9 ደርሳይ ኢቻሻንሶ ማታሚያ ደዪዳ ዎዴ ኤንቲ ያሳ ቃላ ኦዲዳ ጊሾኔ ባንታ ማርካቴላን ኣማኔቲዳ ጊሾ ሹኩቲዳ ኣሳ ሽምፖታ ያርሾ ቤሳፊ ጋርሳን ቤዓሰ።

10 ኤንቲ ባንታ ቃላ ጶቁ ኦላዲ፡ «ኡባ ሃሪያ ጎዳው፡ ጌሻው፡ ቱማንቹዎው፡ ሳዓን ዴዒያ ኣሳ ቦላ ኔ ፐርዳናይኔ ኑ ሱላ ጊሾ ሃሎ ኬያናይ ኣዉዴ?» ያጊደሶና።

11 ኤንታ ኢሱዋሰ ኢሱዋሰ ቦላ ማዎይ ኢሜቲሰ። ኤንታይሳዳ ሃኒዲ ሃይቃናው ቤሲያ ኤንታ ላጌታ ታይቦይ ኩማና ጋካናው ጉላ ዎዴ ሽምፓና ሜላ ኤንታው ኦዴቲሰ።

12 ደርሳይ ኡሱፑንላ ማታሚያ ደዪዳ ዎዴ ታ ቤዓሰ፤ ዎልቃማ ቢታ ቃዎይ ሃኒሰ። ኣዎ ኣይፌይ ካሬዲዲ ካሌ ዳኒሰ። ኣጌናይካ ዞዒዲ ሱሉ ዳኒሰ።

13 ዎልቃማ ጫርኮይ ጫርኪዲ ባላሴ ሚላ ቃዉዔ ኣይፊያ ቆቆፊይሳዳ ሳሉዎ ያለንቶቲ ሳዓን ቆቆፊቲደሶና።

14 ሳሎይ ፃላ ማፃፋዳ ፃፃቲዲ ኣዲሰ፤ ዙማይኔ ኣባን ቴቄቲዳ ቢታቲ ባንታ ቤሳፊ ቆዪደሶና።

15 ቢታ ካዎቲ፡ ዴሪያ ሃሬይሳቲ፡ ኦላ ካሌሌይሳቲ፡ ዲሬቲ፡ ዎልቃማቲ፡ ኣይሌቲኔ፡ ዎማኖቲ ጎንጎሎኒኔ ዴሪያ ቦላ ዴዒያ ዘላ ሆሞዎን ቆሴቲደሶና።

16 ኤንቲካ ዙማኮኔ ዘላኮ፡ «ኑ ቦላ ዎዲቴ፤ ኑና ቆሲቴ፤ ኣራታን ኡቲዳይሳ ኣይፊያፔኔ ደርሳ ሃንቁዎፊ ኑና ጌንሱቴ።

6:5 ዛካ 6:2 6:8 ሃዝ 14:21 6:12 ዮ.ቆ 11:13፤ 16:18፤ ኢሳ 13:10፤
ኤር 2:10 6:13 ኢሳ 34:4 6:14 ዮ.ቆ 16:20 6:15 ኢሳ 2:19 6:16
ሆሴ 10:8፤ ሉቃ 23:30

17 ሂዛ፣ ጌታ ሃንቆ ጋላሳይ ጋኪስ፤ ኦኔ ዳንዳዲ ኤቃናይ?» ያገደሰና።

7

144፥000 አሳታ ቦላ ማታሚይ ዋሴቲስ

1 ሄሳፌ ጉዬ፣ ኦይዲ ኪታንቸቲ ኦይዲ ሳዓ ጋፃን ኤቁዳይሳታ ቤዓስ። ሄ ኪታንቸቲ ሳዓ ቦላ ዋይኮ አባ ቦላ ዋይኮ አይ ሚላ ቦላ ጨርኮይ ኦይዲ ሳዓ ጋፃፕ ጨርኮና ሚላ ቱቁደሰና።

2 ቃሲ ዴዎ ያሳ ማታሚያ ኦይኪዳ ሃራ ኪታንቸይ ዶሎሃ ባጋፌ ኬይይሳ ቤዓስ። ሄ ኪታንቸይ ባ ቃላ ቶቁ ኦሊዲ፣ ሳዓኔ አባ ቆሃናው ዋልቁ አሜቲዳ ኦይዲ ኪታንቸታ።

3 ጃጊዲ፣ «ኮኒ ያሳ አይሌታ ሶሞዎን ማታሚያ ዋላና ጋካናው ቢታ ዋይኮ አባ ዋይኮ ሚላ ቆሆፕቲ» ያገሰ።

4 ያቲን፣ ታኒ ያሳ ማታሚይ ሶሞዎን ዋሴቲዳይሳታ ፓይዲዋ ሲዓስ። ኢስራዔል ማይዛታ ኡባፌ ፃታኔ ኦይታማኔ ኦይዲ ሙኩሉ አሳስ ሶሞዎን ማታሚያ ዋሊስ።

5 ዪሁዳ ዜሬሳፌ ታማኔ ናሞው ሙኩሉ፣

ሮቤላ ዜሬሳፌ ታማኔ ናሞው ሙኩሉ፣

ጋዴ ዜሬሳፌ ታማኔ ናሞው ሙኩሉ፣

6 አሴሬ ዜሬሳፌ ታማኔ ናሞው ሙኩሉ፣

ኒፍታሌሜ ዜሬሳፌ ታማኔ ናሞው ሙኩሉ፣

ሚናሴ ዜሬሳፌ ታማኔ ናሞው ሙኩሉ፣

7 ሲሞና ዜሬሳፌ ታማኔ ናሞው ሙኩሉ፤

ሌዌ ዜሬሳፌ ታማኔ ናሞው ሙኩሉ፣

ዪሳኩሬ ዜሬሳፌ ታማኔ ናሞው ሙኩሉ፣

8 ዛቢሎኔ ዜሬሳፌ ታማኔ ናሞው ሙኩሉ፣

ዮሴፋ ዜሬሳፌ ታማኔ ናሞው ሙኩሉ፣

ቢኒያሜ ዜሬሳፌ ታማኔ ናሞው ሙኩሉ፣

አሳ ሶሞዎን ማታሚያ ዋሊስ።

ቦላ ማዎ ማዒዳ ዳር አሳታ

9 ሄሳፌ ጉዬ፣ ዜሬሊ ኡባፌ፣ ካዎቲላ ኡባፌ፣ ያራ ኡባፌኔ ዲማ ዲማ ዶናፕ ዛዌ ባይና ዳር አሳ ቤዓስ። ሄ አሳይ ቦላ ማዎ ማዒዲ፣ ዛሞባ ሃይሊ ባንታ ኩሼን ኦይኪዲ፣ አራታ ሲንሳኒኔ ዶርሳ ሲንሳን ኤቁደሰና።

10 ከንቲ ባንታ ቃላ ቆቁ ኦሊዲ፥ «አቶቴላይ አራታን ኡቲዳ ኑ ያሳፌኔ ደርሳፌ ዬሰ» ያጊደሶና።

11 ኪታንቸቲ ኡባይ፥ አራታ፥ ጨማታኔ ኦይዲ ሜዴቴላታ ዩሹዋን ኤቂደሶና። ከንቲ አራታ ሲንላን ጉፋኒዲ ያሳ ጎይኒደሶና።

12 «አሚንዒ!

አንጆይ፥ ቦንቸይ፥ ጨንጫቴላይ፥ ጋላታይ፥ ሳባይ
ዋልቃይ፥ ሚኖቴላይ ሜሪ ሜሪናው
ኑ ያሳሰ ጊድ።

አሚንዒ!»

ያጊደሶና።

13 ጨማታፔ ኢሶይ ታኮ፥ «ሃ ቦላ ማዑዋ ማዒዳ አሳቲ ኦናንቲ? ከንቲ አዉፔ ዩደና?» ያጊዲ ኦይቸሰ።

14 ታኒ ዛራዳ፥ «ጎዳው፥ ኔ ኤራሳ» ያጋሰ።

ኢካ ታኮ፥ «ሃይሳቲ ደር ዋዬ ዋዩዲ አዲዳይሳታ። ከንቲ ባንታ ማዑዋ ደርሳ ሱላን ሜጨዲ ጌሺደሶና።

15 ሄሳ ጊሾ፥

ከንቲ ያሳ አራታ ሲንላን ጊዲዲ

ቃማኔ ጋላሰ ኢያ ኬላን ኦሎሶና።

ቃሲ አራታ ቦላ ኡቲዳይሲ ከንታው ኩያ ጊደና።

16 ሂዘፔ ጉዬ፥ ከንቲ ኮሻቶኮና፥ ሳሞቶኮና።

አዊ ዋይኮ ሚሺ ከንታ ሜና።

17 አራታ ጊደን ኡቲዳ ደርሳይ ከንታ ሄማና።

ዴዖ ፑልቶ ሃላኮ ከንታ ካሌላና።

ያሳይ ከንታ አይፊያፔ አፋላ ኡባ ቁቻና።

ያጊሰ።

8

ላፑንላ ማታሚይ ደዬቲሰ

1 ደርሳይ ላፑንላ ማታሚያ ደዬዳ ዋዴ ባጋ ሳቲ ጊዴይሳ ሜላ ሳሎይ ሲዒ ጊሰ።

2 ሄሳፌ ጉዬ፥ ታኒ ላፑን ሞይዘቲ ኢሜቲዳ ላፑን ኪታንቸታ ያሳ ሲንላን ኤቂዳይሳታ ቤዒሰ።

3 ኢፃኔ ጨዩሲያ ዋርቃ ሻቲ ኦይኪዳ ሃራ ኪታንቸይ ዩዲ፥ ያርሾ ቤሳ ማታን ኤቂሰ። ኢ አራታ ሲንላን ዴዒያ ዋርቃ ያርሾ

7:14 ዳኔ 12:1፤ ማቶ 24:21፤ ማር 13:19 7:16 ኢሳ 49:10 7:17 ማዝ 23:1፤ ሂዝ 34:23፤ ማዝ 23:2፤ ኢሳ 49:10፤ ኢሳ 25:8

ቤሳ ቦላ ጌሻታ ኡባ ዋሳራ ጉጂዲ ያርሻና ሜላ ኢያው ዳር ኢፃኔይ ኢሜቲስ።

4 ኢፃኒያ ጩያይ ጌሻታ ዋሳራ ኢሲፌ ከታንቸዋ ኩሼፔ ፑዴ ያሳኮ ከደስ።

5 ሄሳፌ ጉዬ፥ ከታንቸይ ኢፃኔ ጩዩሲያ ሻቲያ ኤኪዲ፥ ኢያን ያርሾ ቤሳፌ ቦንቆ ታማ ኩንሊዲ ሳዓ ዳጌ ሆሊስ። ያቲን ዴሾይ፥ ዋልዓንሊ፥ ገርሲኔ ቢታ ቃይይ ሃኒስ።

ላፑን ሞይዜታ

6 ሄሳፌ ጉዬ፥ ላፑን ከታንቸቲ ባንታ ሞይዚያ ፑናናው ጊጌቲደሶና።

7 ኮይር ከታንቸይ ባ ሞይዚያ ፑኒያ ዋዴ ሻቸኔ ሱላራ ዋላኬቲዳ ታሚ ሳሎፔ ቡኪስ። ሳዓፔ ሲኮይ ፀጌቲስ፤ ሚላፌ ሲኮይ ፀጌቲስ፤ ጩልዎ ማታ ኡባይ ፀጌቲስ።

8 ናምዓንሉ ከታንቸይ ባ ሞይዚያ ፑኒዳ ዋዴ ዋልቃማ ዴሬ ዳኒያባይ ታማን ኤፃሼ ኣባን ዩጌቲስ። ያቲን፥ ኣባፌ ሲኮይ ሱሉ ጊዲስ።

9 ኣባን ዴዎን ዴዒያ ሜዴቴላፌ ሲኮይ ሃይቂስ፤ ማርካቤታፔ ሲኮይ ዳይስ።

10 ሄሻንሉ ከታንቸይ ባ ሞይዚያ ፑኒዳ ዋዴ ዎምፔዳ ኤፃያ ዋልቃማ ያለንቶይ ሻፋፔ ሲኩዋ ቦላኔ ፑልቶታ ቦላ ሳሎፔ ዋዲስ።

11 ሄ ያለንቱዋ ሱንላይ ጫዋ ጌቲቲስ። ሃላፌ ሲኩዋ ጫሚሲስ፤ ሃላይ ጫሚዳ ጊሾ ዳር ኣሳይ ሄ ሃላ ኡዩዲ ሃይቂደሶና።

12 ኦይዳንሉ ከታንቸይ ባ ሞይዚያ ፑኒስ። ኣዋፔ፥ ኣጌናፔኔ ያለንቶታፔ ሲኩዋ ዴቸስ፤ ኤንታ ፖዑዋፔ ሲኮይ ዱሚስ። ጋላሳፔ ሲኮይ፥ ቃማፌካ ሲኮይ ዱሚስ።

13 ኢሲ ኣርጋንሊ ሳሎ ዶቁ ጊዲ፥ ፒራዲሺን ቤዓስ። ሄ ኣርጋንላይ ባ ቃላ ዶቁ ኦሊዲ፥ «ኣቲዳ ሄሹ ከታንቸቲ ባንታ ሞይዚያ ፑናናው ዴዒያ ጊሾ ሳዓን ዴዒያ ኣሳ ኣዬ! ኣዬ! ኣዬ!» ያጊሺን ሲዓስ።

8:5 ለዌ 16:12፤ ሂዝ 10:2፤ ኪሳ 19:16፤ ዮ.ቆ 11:19፤ 16:18 8:7 ኪሳ 9:23-25፤ ሂዝ 38:22 8:10 ኢሳ 14:12 8:11 ኤር 9:15 8:12 ኢሳ 13:10፤ ሂዝ 32:7፤ ኢዩ 2:10

9

1 ሃሳፌ ጉዬ፥ ኢቻሻንሉ ኪታንቸይ ባ ሞይዚያ ፑኒን ሳሎፔ ዲጌ ሳዓ ኩንዲዳ ያለንቶ ቤዓስ። ሄ ያለንቱዋስ ዋልቃማ ኦላ ቁልፔይ ኢሜቲስ።

2 ያለንቶይ ኦላ ደዱዳ ዋዴ ዳልጋ ጮጮፔ ኬያ ጨያ ማላ ጨያይ ሄ ኦላፌ ኬዱስ። ሄ ኦላፌ ኬዱዳ ጨያን ኣዋይኔ ሳሎይ ቋሚደሶና።

3 ሄ ጨያፔ ቦሌይ ኬዱዲ ሳዓን ዋዲስ። ሳዓን ዳዒያ ኮርኔታስ ዳዒያ ዋልቃ ማላ ዋልቂ ቦሌታስ ኢሜቲስ።

4 ያሳ ማታሚይ ሰሞዖን ባይና ኣሳ ፃላላፔ ኣቲን ሳዓን ዳዒያ ማታ ዋይኮ ሚሒ ዋይኮ ኣይ ጨልዖባ ጊዲን ቆሆና ማላ ቦሌታስ ኦዴቲስ።

5 ቦሌቲ ኣሳ ኢቻሹ ኣጌና ጋካናው ፓፃ ካዓና ማላ ማቲ ኢሜቲስፔ ኣቲን ኣሳ ዋዳና ማላ ጊዳና። ኮርኔይ ኣሴ ዲኪን ዛሚይሳ ማላ ቦሌይ ዲኪዲ ዛሚሴስ።

6 ሄ ጋላሳታን ኣሳይ ሃይቆ ኮያና፥ ሺን ዳሚና። ኤንቲ ሃይቃናው ኣሞታና፥ ሺን ሃይቆይ ኤንታፌ ሃካና።

7 ቦሌይ ኦላስ ጊጊ ኡቲዳ ፓራ ዳኔስ። ቦሊያ ሁዔን ዋርቃ ካላቹ ዳዔስ፤ ኤንታ ሰሞዖይካ ኣሳ ሰሞዖ ዳኔስ።

8 ኢያ ቢናናይ ማጫሳ ቢናና ማላ ኣዱስ። ኤንታ ኣቻይካ ጋሞ ኣቹ ዳኔስ።

9 ኤንታው ቲራ ቦላ ዋሒያ ቢራታ ፀሩሬይ ዳዔስ፤ ኤንታ ቄፊያ ጊርሳይ ኦሌታናው ጋላቢያ ፓራኔ ፓራ ጋሬ ጊርሳ ማላ።

10 ኤንታው ኮርኔ ጎይና ዳኒያ ጎይኒኔ ዲኪያ ዪሺ ዳዔስ። ሄ ጎይናን ኢቻሹ ኣጌና ኣሳ ቆሃና ማላ ማቲ ኢሜቲስ።

11 ኤንታና ሃሪያ ካዋይ ዳዔስ፤ ሄ ካዋይ ኦላ ኪታንቸዋ። ኢያ ሰንጎይ ኢብራይስፃ ዶናን ኣብዶና፤ ቃሲ ጊርኬ ዶናን ኣጳሊዮና ጌቴቴስ። ኢያ ሱንጎ ቢርሹላይ «ዳይሴይሳ» ጉሱ።

12 ኮይሮ ኣዬይ ኣዲስ፤ ሄኮ፥ ቡሮ ሃራ ናሞዑ ኣዬቲ ኤሶን ሃናና።

13 ኡሱፑንጎ ኪታንቸይ ባ ሞይዚያ ፑኒስ። ያሳ ሰንጎን ኤቂዳ፥ ዋርቃ ያርሾ ቤሳን ዳዒያ ኦይዱ ካጮታፔ ኢሲ ጊርሲ ሲዓስ።

9:2 ሜዶ 19:28 9:3 ኬሳ 10:12 9:4 ሃዝ 9:4 9:6 ኢዮ 3:21፤
ኤር 8:3 9:7 ኢዮ 2:4 9:8 ኢዮ 1:6 9:9 ኢዮ 2:5 9:13 ኬሳ 30:1

14 ሄ ገርሳይ ሞይዜ ኦይኪዳ ኡሱፑንላ ኪታንቸዋኮ፡ «ኤፊራዲሴ ጊያ ጊታ ሻፋን ቃሼቲዳ ኦይዱ ኪታንቸታ ቢርሻ» ያገሰ።

15 ቢታ ቦላ ዳዒያ አሳፔ ሲኩዋ ዋጳና ማላ ሄ ሳቲያሰ፡ ሄ ጋላሳሰ፡ ሄ አጌናሲኔ ሄ ላይላሰ ገጊዲ ኡቲዳ ኦይዱ ኪታንቸቲ ቢርሼቲዶሶና።

16 ኦላ ፓራ ቶጊያ ኦላንቸታ ፓይዶይ ዳሮ ጻቴ ማሎኔ ገዳይሳ ሲዓሰ።

17 ቃሲ ታ ቆንጮፋን ፓራታኔ ሄ ፓራታ ቶጊዳ አሳ ቤዓሰ። ሄ አሳይ ቲራን ዋሊያ ቢራታ ፀሩሬይ ታማ ቦንቆ ማላ ዘዖ፡ ያኪንቲ ማላ፡ ካራፋ ካሎሴ ማላኔ ዲኔ ማላ ጨሊሎ። ፓራታ ሁዔይ ጋሞ ሁዔ ማላ፤ ኤንታ ዶናፔ ታሚ፡ ጨዩኔ ዲኔይ ከዩሰ።

18 ፓራታ ዶናፔ ከዩዳ ታማን፡ ጨያኒኔ ዲኒያን ሄ ሄሹ ጋዶታን ሳዓን ዳዒያ አሳፔ ሲኮይ ሃይቁሰ።

19 ሄ ፓራታ ዋልቃይ ኤንታ ዶና ገዶኒኔ ጎይናን ዳዔሰ። ኤንታ ጎይናይካ ሸሻ ሁዔ ማላ፤ ኤንቲ ኢያራ አሳ ቆሆሶና።

20 ሃ ጋዶታፔ አቲዳይሳቲ ባንታ ኩሼ ኦሱዋፔ ሲሚቦኮና። ኤንቲ ቱና ኢያናን ዋርቃሬ፡ ቢራፔ፡ ናሴ ቢራታፔኔ ሹቻሬ ኦሴቲዳ ኤቃሰ ጎይናሶና። ጻላናው፡ ሲዓናው፡ ሃሙታናው ዳንዳዖና ኤቃታሰ ጎይኔይሳ አገቦኮና።

21 አሳይ ዋዴይሳ፡ ቢቲይሳ፡ ላይማቴይሳኔ ካይሴይሳ አገዲ ማርታ ኦይቹቦኮና።

10

ኪታንቸዋኔ ጉላ ማፃፋ

1 ሄሳፌ ጉዬ፡ ታ ሃራ ዋልቃማ ኪታንቸይ ሳሎፔ ሳዓ ዋዲሺን ቤዓሰ። ኢ ሻራ ማዒሰ፤ ኢያ ሁዒያ ቦላ ዙላይ ዳዔሰ። ኢያ ሰሞዖይ አዋ ማላ፤ ኢያ ቶሆይ ታማ ቱሳ ማላ።

2 ሄ ኪታንቸይ ዶያ ዳዒያ ኢሲ ጉላ ፃላ ማፃፋ ባ ኩሼን ኦይኪዲ፡ ባ ኡሻቻ ቶሁዋ አባ ቦላ፡ ባ ሃዲርሳ ቶሁዋ ቢታ ቦላ ኤሰሰ።

3 ጉዲያ ጋሞዳ ባ ቃላ ቶቁ ኦሊዲ ዋሲሰ። ኢ ዋሲዳ ዋዶ ላፑን ዳዳቲ ባንታ ጉንላ ሲሲዶሶና።

4 ላፑን ዳዳቲ ኦዲቲዳ ዎዴ ታ ፃፋናው ገቢታሰ። ሺን ሳሎፔ፡ «ላፑን ዳዳቲ ኦዲዲይሳ ማታሚን ጎርዳፌ ኣቲን ፃፎፓ» ያገያ ገርሳ ሲዓሰ።

5 ያቲዲ፡ ኣባ ቦላኔ ቢታ ቦላ ኤቂዲ፡ ታ ቤዒዳ ኪታንቾይ፡ ባ ኡሻቻ ኩሺያ ሳሎ ፑዴ ሚጨሰ።

6 ኢ ሚጨዲ ሳሎኒኔ ኢያ ገደን ዴዒያ ኡባ፡ ሳዒኒኔ ኢያ ገደን ዴዒያ ኡባ፡ ኣባኔ ኢያ ገደን ዴዒያ ኡባ ሚጲዳ፡ ሚሪናው ዴዒያ ያሳ ሱንሳን ጨቂዲ፡ «ሂዛፔ ጉዬ፡ ያሳይ ጋምዔና።

7 ሺን ላፑንሳ ኪታንቾይ ባ ሞይዚያ ፑኒያ ዎዴ ያሳይ ባ ኣይሌ ገዲዳ ናቤታ ባጋራ ቆንጨሲዳ ፀራ ቆፋይ ፖሌታና» ያገሰ።

8 ሄሳፌ ጉዬ፡ ኣባ ቦላኔ ቢታ ቦላ ኤቂዲ፡ «ኢያ ኩሺን ዶዴቲዲ ዴዒያ ፃላ ማፃፋ ኪታንቾዎ ኩሺፔ ኤካ» ያገዲ ናምዓንሉ ታው ኦዲሺን ሲዓሰ።

9 ታኒ ሄ ኪታንቾዎኮ ባዳ፡ ጉላ ፃላ ማፃፋ ኢማ ጋዳ ኦይቻሰ። ኢ ታኮ፡ «ኤካዳ ማ፤ ኢ ኔ ኡሎን ጨማና፡ ሺን ኔ ዶናን ኤሳዳ ማልዓና» ያገሰ።

10 ታኒ ኪታንቾዎ ኩሺፔ ሄ ጉላ ፃላ ማፃፋ ኤካዳ ማሰ፤ ታ ዶናን ኤሳዳ ማልዒሰ። ሺን ታ ኡሎን ጨሚሰ።

11 ሄሳፌ ጉዬ፡ ታኮ፡ «ኔኒ ያራ ኡባሰ፡ ዴሬ ኡባሰ፡ ዶማ ዶማ ዶናን ኦዴቲይሳታሲኔ ካዎታሰ ቲንቢቲ ዛራ ኦዳናው ቤሴሰ» ያገሰ።

11

ናምዑ ማርካታ

1 ሄሳፌ ጉዬ፡ ታው ዋቋ ፃምዓ ኢሚዲ፡ «ባዳ ያሳ ኬላኔ ያርሾ ቤሳ ዋቋ፤ ያን ጎይኒያ ኣሳታካ ፓይዳ።

2 ሺን ያሳ ኬላ ካሬ ዳባባይ ኣይሁዴ ገደና ኣሳሰ ኢሜቲዳ ገሾ ዋቋና ኣጋጋ። ኣይሁዴ ገደና ኣሳይ ጌሻ ካታማ ኦይታማኔ ናምዑ ኣጌና ሃራና።

3 ታኒ ካሌ ማዒዳ ታ ናምዑ ማርካታ ኪታና፤ ኤንቲ 1260 ጋላሰ ቲንቢቲ ኦዳና» ያገሰ።

4 ሄ ናምዑ ማርካቲ ኣላሚያ ጎዳ ሲንሳን ኤቂያ ናምዑ ሻማሆ ሚላታኔ ናምዑ ያምፔ ዎሊያ ኮጫታ።

10:5 ኬሳ 20:11፤ ዛሬ 32:40፤ ዳኔ 12:7፤ ኣሞ 3:7 10:8 ሂዝ 2:8-3:3
11:1 ሂዝ 40:3፤ ዛካ 2:1 11:2 ሉቃ 21:24 11:4 ዛካ 4:3

5 እነካ ከንታ ቆሃናው ኮይኮ ከንታ ደናፔ ታሚ ከዱዲ፣ ከንታ ሞርኬታ ቆይሱስ። ከንታ ቆሃናው ኮያ እነካ ሃሳዳ ሃይቃና።

6 ከንቲ ቲንቢቲ ኦዲያ ዋዴ ኢሪ ቡኮና ሜላ ሳሉዋ ጎርዳናው ከንታው ማቲ ዴዔስ። ከንታው ሃሌ ሱሌ ከሳናው፣ ቃሲ ከንቲ ኮዱዳ ሜላ ቢታ ዲማ ዲማ ጋዶን ቆይሳናው ከንታው ማቲ ዴዔስ።

7 ከንቲ ባንታ ማርካቴላ ኦንጊዳፔ ጉዬ፣ ኦላፌ ከያ ደዓይ ከንታና ኦላና። ሄ ደዓይ ከንታ ያናና፤ ዋቆና።

8 ከንታ ጎዳይ ማስቃሊያ ቦላ ካቄቲዳ ጊታ ካታማ አጊያ ቦላ ከንታ እሃይ ዩጌታና። ሄ ካታማይ ለሚሶን ሶዶሜ ዋይኮ ጊብዳ ጌቲቲ ያጌቲስ።

9 ቃሲ ዜሬሌ ኡባፌ፣ ያራ ኡባፌ፣ ዲማ ዲማ ደናፔኔ ካዋቴሌ ኡባፌ ዩዳ አሳይ ከንታ እሃ ሄቩ ጋላሲኔ ባጋ ጋካናው ቤዓና። ከንታ እሃይ ሞጌቶና ሜላ አሳይ ዲጋና።

10 ሃ ናምዑ ናቤቲ ሳዓን ዴዒያ አሳ ዋይሲዳ ጊሾ አሳይ ከንታ ሃይቁዋን ኡፋይታና። ባንታ ኡፋይሳ ቤሳናው ኢሶይ ኢሱዋስ አሞታ አማና።

11 ሄቩ ጋላሲኔ ባጋፌ ጉዬ፣ ዴዖ አያናይ ያሳ ማታፔ ዩዲ ከንታን ጌሊን፣ ከንቲ ዴንዲ ኤቁዶሶና። ከንታ ቤዒዳ ኡባይ ጊታ ያሺ ያዩዶሶና።

12 ሄሳፌ ጉዬ፣ ሄ ናምዑ ናቤቲ፣ «ሃ ፑዴ ኬዩቴ» ጊያ ቃላ ሳሎፔ ሲዒዶሶና። ከንታ ሞርኬቲ ከንታና ቤዒሺን፣ ከንቲ ሻራን ጌሊዲ ፑዴ ሳሎ ቢዶሶና።

13 ሄ ሳቲያን ቢታይ ዋልቃማ ቃዖ ቃዒን፣ ካታማፔ ታማንላ ኩሼይ ቆይሱስ። ቃሲ ቢታ ቃዖን ላፑን ሙኩሉ አሳይ ሃይቁስ። አቲዳ አሳይ ዳሮ ኮኮሪዲ ባቢዲ፤ ሳሎ ያሳስ ቦንቾ ኢሚዶሶና።

14 ናምዓንላ አዬይ አዲስ፣ ሺን ሄኮ ሄቸንላ አዬይ ኤሶን ያና።

ላፑንላ ሞይዚያ

15 ላፑንላ ኪታንቾይ ባ ሞይዚያ ፑኒስ። ሳሎፔ፣ «ሳዓ ካዋቴላይ ኑ ጎዳሲኔ ከሪሰቶሳስ ጊዲስ፤ ኢ ሜሪናፔ ሜሪና ጋካናው ሃራና» ያጊያ ዋልቃማ ቃላይ ሲዔቲስ።

16 ያቲን፣ ያሳ ሲንላን፣ ባንታ አራታን ኡቲዳ ላታማኔ ኦይዲ ጨማቲ ጉፋኒዲ፣ ያሳስ ጎይኒዲ፣

11:6 1ካዎ 17:1፤ ኬሳ 7:17 11:7 ዳኔ 7:7፤ ዮ.ቆ 13:5 11:8 አሳ 1:9 11:11 ሂዝ 37:10 11:12 2ካዎ 2:11 11:13 ዮ.ቆ 6:12፤ 16:18
11:15 ኬሳ 15:18፤ ዳኔ 2:44፤ 7:14

17 «ሃዲካ ካሴካ ዳዔይሶ፥
 ጎዳው፥ ኡባፌ ዋልቃማ ያሳው፥
 ኔኒ ጌታ ዋልቃ ኦይካዳሳ።
 ኔኒ ሃራናው ደሚዳ ጌሾ
 ኩኒ ኔና ጋላቶስ።
 18 ኣይሁዳ ጌዶና ኣሳይ ሃንቄቲዶሶና፥
 ሸን ኔ ሃንቆይ ዪስ።
 ሃይቄዳይሳታ ቦላ ኔ ፐርዲያ ዋዳይ ዪስ።
 ኔኒ ኔ ኣይሌታ፥ ናቤታስ
 ጌሻታሲኔ ኔ ሱንላስ ያዩይሳታስ፥
 ጉላታሲኔ ጌታታስ፥ ኤንታ ኦሱዋዳ ኢሚያ ዋዳይ ጋኪስ።
 ኣላሚያ ቆይሴይሳታ ቆይሴያ ዋዳይ ዪስ»
 ያጌደሶና።

19 ሳሎን ዳዒያ ያሳ ከላይ ደዬቲስ፤ ኢያ ጌደን ያሳ ጫቆ
 ታቦቴይ ቤንቲስ። ቃሲ ዋልዓንሳ ዋልዓሚስ፥ ዳሾይ ዳቺስ፤ ዳዲ
 ቆቁስ፤ ቢቲ ቃዲስ፤ ሻቺ ቡኪስ።

12

ማጨሲውኔ ዳዒያ

- 1 ሃሳፌ ጉዬ፥ ሳሎን ዋልቃማ ማላቲ ቤንቲስ። ኣዋ ማዓዳ፥
 ኣጌና ቦላ ኤቃዳ፥ ታማኔ ናምቡ ያሊንቶ ካላቻ ባ ሁዔን ዋሉዳ
 ዳዒያ፥ ኢሲ ማጨሲያ ቤንታሱ።
- 2 ሄ ማጨሲያ ቃንጮሽን፥ ኢዮ ኣቆሊ ኦይኪን ኡንዔታዳ ዋሳሱ።
- 3 ቃሲ ሃራ ማላቲ ሳሎን ቤንቲስ። ላፑን ሁዔቲኔ ታሙ ካጨቲ
 ዳዒያ ጌታ ዘዖ ዳዌይ ቤንቲስ። ኢ ባ ሁዔታ ቦላ ላፑን ካላቻ
 ዋሉስ።
- 4 ሄ ዳዌይ ባ ጎይናን ያሊንቶታፔ ሲኩዋ ሳሎፔ ዳፊዲ ሳዓን
 ዩጊስ። ሄ ዳዌይ ናዓይ ዩሌቲ ዋዲዳ ሜላ ሚታናው ኮዩዲ፥
 ዩላናው ኤቁቲያ ማጨሴ ሲንሳን ኤቁስ።
- 5 ሄ ማጨሲያ ካዋቲላ ኡባ ቢራታ ፃምዓን ሃራናው ዳዒያ
 ኣዳ ናዓ ዩላሱ። ናዓይ ያሳኮኔ ኢያ ኣራታኮ ፑዳ ኤኬቲስ።
- 6 ማጨሲያ 1260 ጋላስ ጋካናው ኢዮ ናጋና ሜላ ያሳይ ኢው
 ጊጊሲ ዋሉዳ ቤሳ ባዘ ቢታ ባቃታሱ።

11:17 ከሳ 3:14 11:18 ማዘ 2:5፤ 110:5፤ 115:13 11:19 ዮ.ቆ 8:5፤
 16:18፤ 21 12:3 ዳኔ 7:7 12:4 ዳኔ 8:10 12:5 ኢሳ 66:7፤ ማዘ
 2:9

7 ሳሎን ኦሊ ሜዴቲስ። ሚካዔሌይ ባ ኪታንቸታራ ዳዊያራ ኦሌቲስ፤ ዳዊይ ባ ኪታንቸታራ ጊዲዲ ዛሪ ኦሌቲስ።

8 ሺን ዳዊይ ያኔቲዲ ሳሎን ኤንታው ዳዒያ ቤሲ ቆዩዶሶና።

9 ጊታ ዳዊይ፣ ቤኒ ሾሻይ፣ ሳዓን ዩጌቲስ። ኢካ ዳቡሎሳ ዎይኮ ፃላሄ ጌቲቲያ አላሚያ ባሌጭሳ። ኢ ባ ኪታንቸታራ ኢሲፌ ዳጌ አላሚያ ዩጌቲስ።

10 ሄሳፌ ጉዬ፣ ሳሎን ሃይሳዳ ያጊያ ቃላ ሲዓስ።

«ሃዒ አቶቴሳይ፣ ዎልቃይኔ ካዎቴሳይ፣ ኑ ያሳሳ፤ ማታይ ኪሪስቶሳስ ጊዲስ።

ሂዛ፣ ቃማኔ ጋላስ ያሳ ሲንሳን፣

ኑ አሻታ ሞቴይሲ ሳሎፔ ዳጌ ሆሌቲስ።

11 ኤንቲ ዶርሳ ሱላኒኔ ባንታ ማርካቴሳ ቃላን፣

ኢያ ኦሊዲ ያኒዶሶና።

ኤንቲ ባንታ ሺዎፑዎስ ሚሼቶና

ባንታና ሃይቆስ አሊ ኢሚዶሶና።

12 ሄሳ ጊሾ፣ ሳሎኒኔ ኢያ ጊዶን ዳዔይሳቶ ኡፋይቲቴ።

ሺን ቢታኔ አባ አዬ!

ሂዛ፣ ፃላሄይ ባው ጉሳ ዎዴይ አቲዳይሳ ኤሪዳ ጊሾ

ዎልቃማ ሃንቆን ሂንቴኮ ዎዲስ»

ያጊስ።

13 ቃሲ ዳዊይ ባና ሳዓ ዩጊዳይሳ ቤዒዳ ዎዴ አዴ ናዓ ዩሊዳ ማጫሲው ጎዲስ።

14 ማጫሲው ሾሻይ ቆሆና ሜላ ሄዥ ላይሲኔ ባጋ ማሼኔ ኡያሼ ኢያ ናጌቲያ ቤሲ ባዞ ቢታ ፒራቆዳ ባና ሜላ ናምዑ ዎልቃማ አርጋንሳ ቄፌይ ኢው ኢሜቲስ።

15 ያቲዲ፣ ማጫሲው ዲያይ ዲዒዲ ኤፋና ሜላ ዳዊይ ሻፋ ሃላ ሜላ ባ ዶናፔ ማጫሴ ጉዬራ ጮዩስ።

16 ሺን ቢታይ ማጫሲው ማዲስ፤ ቢታይ ባ ዶና ዶዩዲ ዳዊያ ዶናፔ ኬዩዳ ሃላ ሚቲስ።

17 ሄ ዳዊይ ማጫሴ ቦላ ዳሮ ሃንቁቲዲ፣ ኢ ዜሬሳታ፣ ያሳ ኪታ ናጌይሳታኔ ዩሱሲ ቆንጪሲዳ ቱማስ አማኔቲዳይሳታ አላናው ቢዲ።

18 አባ ጋፃን ዳዒያ ሻፊያን ኤቂስ።

12:7 ዳኔ 10:13 12:9 ሜዴ 3:1፤ ሉቃ 10:18 12:10 ኢዮ 1:9 12:14 ዳኔ 7:25፤ 12:7

13

ናምዑ ደዓታ

1 ሃሳፌ ጉዬ፥ ኢሲ ደዓይ ኣባፌ ኬዩሺን ቤዓስ። ኢያው ታሙ ካጩይኔ ላቸን ሁዔይ ዴዔስ። ሄ ታሙ ካጩታ ቦላ ታሙ ካላቻቲ ዴዖሶና። ሄ ሁዔታ ቦላ ዖሳ ጫሻ ሱንጎቲ ፃፊቲዲ ኡቲስ።

2 ታ ቤዒዳ ደዓይ ማሄ ዳኔስ፤ ኢያ ቶሆይ ባባንጎ ቶሆ ማላ፤ ኢያ ደናይካ ጋሞ ደና ዳኔስ። ዳዌይ ባ ዎልቃ፥ ባ ኣራታኔ ባ ጊታ ማታ ሄ ደዓስ ኢሚስ።

3 ሄ ደዓ ሁዒያፕ ኢሱዋ ቦላ ሃይቆስ ጋሲያ ማዲንላ ቤዓስ፥ ሸን ሄ ማዲንጎይ ፓዒስ። ኣላሚያ ኣሳ ኡባይ ማላሌቲዲ ሄ ደዓ ካሊስ።

4 ዳዌይ ባ ማታ ደዓስ ኢሚዳ ጊሾ ኣሳ ኡባይ ዳዌያ ጎይኒደሶና። ቃሲ ኣሳይ፥ «ደዓ ማሊ ኦኔ? ኢያራ ኦሌታናው ዳንዳዔይ ኦኔ?» ያጊዲ ደዓስ ጎይኒደሶና።

5 ሄ ደዓስ ኦቶርታና ማላኔ ጫያና ማላ ደኒ ኢሜቲስ፤ ኦይታማኔ ናምዑ ኣጌና ሃራና ማላ ማቲ ኢያው ኢሜቲስ።

6 ሄ ደዓይ ዖሳ፥ ኢያ ሱንጎ፥ ኢ ዴዒያ ቤሳኔ ሳሎን ዴዒያ ኡባ ቃንጌላ ኦይኪስ።

7 ሄ ደዓይ ጌሻታራ ኦሌቲዲ፥ ኤንታና ዖናና ማላ ዎልቁ ኢያው ኢሜቲስ። ያራ ኡባ፥ ዴሬ ኡባ፥ ዴማ ዴማ ደና ኡባ ቦላኔ ዜሬላ ኡባ ቦላ ማቲ ኢያው ኢሜቲስ።

8 ኣላሚይ ማዴቶሳፕ ደሚዲ፥ ሹኬቲዳ ደርሳ ዴዖ ማፃፋን ኤንታ ሱንጎይ ፃፊቶና ሃ ሳዓን ዴዒያ ኣሳ ኡባይ ሄ ደዓስ ጎይናና።

9 ሲዒያ ሃይላ ዴዒያ ኣሲ ሲዖ።

10 ኦኒካ ዲዔታናው ዴዔይ ዲዔቲስ። ማሻን ሃይቃናው ዴዔይ ማሻን ሹኬታና። ሄሳንካ ጌሻታ ዳንዳዔይኔ ኣማኖይ ኤሬታና።

11 ቃሲካ፥ ሃራ ደዒ ሳዓፕ ኬዩሺን ቤዓስ። ኢያው ደርሳ ካጩ ዳኒያ ናምዑ ካጩይ ዴዔስ፤ ኢያ ሃሳያይ ዳዌይሳ ማላ።

12 ሄ ደዓይ ኮይሮ ደዓ ቤሳን፥ ኢያ ማታን ኦሴስ። ኢካ ሃይቆስ ጋሲያ ማዲንጎፊ ፓዒዳ ኮይሮ ደዓስ፤ ቢታን ዴዒያ ኣሳ ኡባይ ጎይናና ማላ ኦሴስ።

13:1 ዳኔ 7:3፤ ዮ.ቆ 17:3 13:2 ዳኔ 7:4 13:5 ዳኔ 7:8፤ 25፤ 11:36
13:7 ዳኔ 7:21 13:8 ማዘ 69:28 13:10 ኤር 15:2፤ 43:11

13 ሄ ናምዓንሉ ደዓይ ሃሪ ኣቶሺን፣ ታማ ሳሎፔ ኣሳ ኡባ ሲንላን ዋጂሳና ጋካናው ጊታ ማላታታ ኦሊስ።

14 ኮይሮ ደዓ ቤሳን ኦላና ሜላ፣ ኢያው ኢሜቲዳ ማላታታን ሳዓን ዳዒያ ኣሳ ኡባ ኢ ባሌሊስ። ማሻን ማዲንዲ ፓዲዳ ደዓ ቦንቸሰ ሚሲሌ ጊሊሳና ሜላ ኤንታና ኪቲስ።

15 ናምዓንሉ ደዓይ ኮይሮ ደዓ ሚሲሊያስ ሸምፖ ኢሚዲ ኦይታና ሜላኔ ኢያው ጎይኖናይሳቲ ሃይቃና ሜላ ኦሊያ ማቲ ኢሜቲስ።

16 ሄ ናምዓንሉ ደዓይ ጊቲኔ ጉሊ፣ ማንቆይኔ ዲሬይ፣ ዋማኖይኔ ኣይሌይ ባ ኡሻቻ ኩሼን ዋይኮ ባ ሶምዖን ማላ ዋላና ሜላ ኦሊስ።

17 ሄ ደዓ ሱንላይ ዋይኮ ኢያ ሱንላ ፓይዱዋ ማላይ ባይና ኣሲ ኦኒካ ባይዛናዉኔ ሻማናው ዳንዳዔና።

18 ጨንጫቲሉ ኮሼይ ሄሳና። ኤራቲሉ ዳዒያ ኦኒካ ሄ ደዓ ፓይዱዋ ቢርሼላ ኤር፤ ሄ ፓይደይ ኣሳ ሱንሉ። ሄ ፓይደይ ኡሱቸን ፃታኔ ኡስቸን ታማኔ ኡሱቸና።

14

ደርሳኔ 144፣000 ኣሳ

1 ሄሳፌ ጉዬ፣ ደርሳይ ዊዮኔ ዳሪያ ቦላ ኤቁዳይሳ ቤዓስ። ኢያራ ኢያ ሱንላይኔ ኢያ ኣዋ ሱንላይ ኤንታ ሶምዖን ፃፌቲዳ፣ 144፣000 ኣሳይ ዳዔስ።

2 ሳሎፔ ጊታ ሃላ ጉንሉኔ ዳዳ ጉንሉ ዳኒያ ዋልቃማ ጊርሲ ሲዓስ። ቃሲ ታ ሲዒዳ ጊርሳይ ዲሉ ዲዲሺን ሲዔቲያ ጊርሳ ሜላ።

3 144፣000 ኣሳይ ኣራታ ሲንላን፣ ኦይዱ ዳዖን ዳዒያ ሜጴቲላታ ሲንላኒኔ ጨማታ ሲንላን ኤቁዲ ኤንታፌ ሃራ ኦኒካ ታማራናው ዳንዳዖና ኦራላ ማዝሙራ ዩዲዶሶና።

4 ሃይሳቲ ማጫሳራ ባንታና ቱኒሶና ናጊዳ ጌሻታ። ኤንቲ ደርሳይ ቢያሶ ኡባ ካሎሶና። ኤንቲ ያሳሲኔ ደርሳሰ ባይራ ጊዲዲ፣ ሺቃናው ሳዓ ኣሳ ጊደፌ ዋዜቲዶሶና።

5 ኤንቲ ዋርደይኔ ቦሬይ ባይና ኣሳታ።

ሄቩ ኪታንቸታ

6 ሄሳፌ ጉዬ፡ ሜሪና ዋንጌላ ሳዓ ቦላ ደዒያ ካዎቲላ ኡባስ፡ ዜሬሌ ኡባስ፡ ያራ ኡባሲኔ ዲማ ዲማ ዶና ኡባስ ማርካታናው ሳሎራ ፒራዲያ ሃራ ኪታንቸ ቤዓስ።

7 ሄ ኪታንቸይ ባ ቃላ ቶቁ ኦሊዲ፡ «የሳይ አላሚያ ፒርዲያ ሳቲይ ጋኪዳ ጊሾ ያሳስ ያዩቲ፤ ኢያ ቦንቲቲ። ሳሎ፡ ሳዓ፡ አባኔ ፑልቸ ሃላ ሜዲዳ ያሳ ጎይኒቲ» ያጊስ።

8 ኮይርይሳ ካሊዲ ሃራ ናምዓንሉ ኪታንቸይ፡ «ዴሬ ኡባ ቱናኔ ማሉያ ዋይኔ ኡሺዳ፡ ጊታ ባቢሎኔይ ኩንዳሱ! ኩንዳሱ!» ያጊዲ ዋሲስ።

9 ሄቫንሉ ኪታንቸይ ኤንታ ካሊዲ፡ ባ ቃላ ቶቁ ኦሊዲ፡ «ዶዓኔ ኢያ ሚሲሊያ ጎይኒይ ቃሲ ኢያ ማላ ባ ሶምዖን ዋይኮ ባ ኩሼን ዋሊያ ኦኒካ ዴዒኮ፡

10 ኢ ሃንቆ ፀዓን ኩሚዳ ያሳ ሃንቆ ዋይኒያ ኡያና፡ ኤንቲ ጌሻ ኪታንቸታ ሲንላኒኔ ዶርሳ ሲንላን ኤዲያ ዲኔ ታማን ዋይታና።

11 ኤንታ ዋያ ጩያይ ሜሪ ሜሪናው ጩዩሼ ዳና። ዶዓኔ ኢያ ሚሲሊያ ጎይኒይ ቃሲ ሄ ዶዓ ሱንላ ማላይ ደዒያ ኦኒካ ቃማኔ ጋላስ ሼምፖይ ባይና ካዔታና» ያጊስ።

12 ያሳ ኪታ ናጌይሳቲኔ ዩሱሳ አማኔቲይሳቲ ጌንጩያ ሚኖቲላይ ቆንጩያ ዋይይ ሄሳ።

13 ሄሳፌ ጉዬ፡ «ሂዛፔ ጎዳን ሃይቄይሳቲ አንጃቲዳይሳታ» ያጊያ ቃላ ሳሎፔ ሲዓስ።

አያናይ፡ «ኤ ቱማ፡ ኤንታ ኦሶይ ኤንታ ካሊያ ጊሾ ኤንቲ ባንታ ዳቡራፔ ሼምፓና» ያጌስ።

ካላ ሺሾ ዋዴ

14 ሄሳፌ ጉዬ፡ ቦላ ሻራ ቦላ ኡቲዳ አሳ ናዓ ዳኔይሳ ቤዓስ። ኢ ባ ሁዔን ዋርቃ ካላቻ ዋሊስ፤ ቃሲ ባ ኩሼን ባጫ ኦይኪስ።

15 ሃራ ኪታንቸይ ያሳ ኬላፌ ኬዩዲ፡ ሻራ ቦላ ኡቲዳይሳኮ ባ ቃላ ቶቁ ኦሊዲ፡ «ካላ ሺሾ ዋዴይ ጋኪዳ ጊሾ ኔ ባጫ ዩዳዳ ካላ ጫካ፤ ሳዓን ደዒያ ካላይ ጋኪስ» ያጊስ።

16 ያቲን ሻራ ቦላ ኡቲዳይሲ ባ ባጫ ሳዓ ዩዲዲ፡ ሳዓን ደዒያ ካላ ጫኪስ።

14:8 ኢሳ 21:9፤ ኤር 51:8፤ ዮ.ቆ 18:2 14:10 ኢሳ 51:17፤ ሜዴ 19:24፤ ሂዝ 38:22 14:11 ኢሳ 34:10 14:14 ዳኔ 7:13-14 14:15 ኢዩ 3:13

17 ቃሲካ ሳሎን ዳዒያ ያሳ ከላፌ ሃራ ኪታንቸይ ከዪሰ፤ ኢያወካ ኦጮ ባጪ ዳዒሰ።

18 ታማ ቦላ ማቲ ዳዒያ ሃራ ኪታንቸይ ያርሾ ቤሳፌ ከዪሰ። ኢ ባ ቃላ ቶቁ ኦሲዲ ኦጮ ባጫ ኦይኪዳ ኪታንቸዋኮ። «ዎይኔ ኦይፌይ ቱሪዳ ጊሾ ኔ ኦጮ ባጫ ዬዳዳ፣ ሳዒን ዳዒያ ዎይኒያፕ ቃንፃ» ያጊሰ።

19 ሄ ኪታንቸይ ባ ባጫ ዬዳዳ፣ ሳዒን ዳዒያ ዎይኒያፕ ቃንፃዲ፣ ያሳ ጊታ ሃንቁዋ ጉምዒያ ቤሳን ዬጊሰ።

20 ኤንቲ ካታማፔ ጋፃን ዳዒያ ዎይኔ ኦይፌ ጉምዒያ ቤሳን ዬዴቲዶሶና። ሱላ ዎይኒያ ጉምዒያ ቤሳፌ ከዪዲ ኢሲ ሙኩሉኔ ኡሰፕን ፃቱ ኪሎ ሚቲሬ ሜላ ሃኪዲ፣ ፓራ ፑሎ ጋኪያ ሜላ ኤሊዲ ቶቁ ጊሰ።

15

ወርሴላ ቦሻታ

1 ታኒ ሳሎን ሃራ ጊታኔ ማላሊሲያ ማላታ ቤዓሰ። ያሳ ወርሴላ ሃንቁዋ ቆንጪሲያ ላፑን ቦሻታ ኦይኪዳ ላፑን ኪታንቸቲ ዳዖሶና።

2 ቃሲ ታማራ ዋላኬቲዳ ቡርጩኮ ኦባ ዳኔይሳ ቤዓሰ። ሄ ኦባ ጋፃን ዶዳ፣ ኢያ ሚሲሊያኔ ኢያ ሱንላ ታይቡዋ ያኒዳይሳታ ቤዓሰ። ያሳይ ኤንታው ኢሚዳ ዲላ ኦይኪዲ ኤቁዶሶና።

3 ኤንቲ ያሳ ኦይሊያ ሙሴ ማዝሙሪያኔ ዶርሳ ማዝሙሪያ ሃይሳዳ ያጊድ ዬዖሶና።

«ጎዳው፣ ኡባፌ ዎልቃማ ያሳው፣

ኔ ኦሶይ ጊታኔ ማላሊሲያባ።

ዳሬ ኡባ ካዎው፣

ኔ ኦጌይ ዓሎኔ ቱማ።

4 ጌሺ ኔ ፃላላ ጊዲያ ጊሾ

ጎዳው፣ ኔው ያዮናይኔ

ኔ ሱንላ ቦንቸናይ ኦኔ?

ኔ ዓሎ ኦሶይ ኦሳ ኡባሰ ቆንጩ ጊዲያ ጊሾ

ካዎቴላ ኡባይ ኔ ሲንሴ ዪዲ ጎይናና»

ያጊዲ ዬዖሶና።

14:20 እሳ 63:3፤ ኤር.ዜ 1:15፤ ዮ.ቆ 19:15 15:3 ኬሳ 15:1 15:4 ኤር 10:7፤ ማዝ 86:9

5 ሃሳፌ ጉዬ፣ ሳሎን ደዬቲዲ ዳዒያ ጾሳ ኬላ፣ ኢካ ማርካቴላ ዲንካኒያ ቤዓሰ።

6 ላፑን ቦሻታ ኦይኪዳ ላፑን ኪታንቸቲ ጾሳ ኬላፌ ኬዪደሶና። ኤንቲ ጌሺኔ ጸሊያ ሊኖ ማዖ ማዒደሶና፤ ባንታ ቲራን ዋርቃ ዳንጮ ዳንጪደሶና።

7 ኦይዲ ሜዴቴላታፔ ኢሶይ፣ ማሪናው ዳዒያ ጾሳ ሃንቆይ ኩሚዳ ላፑን ዋርቃ ፀዓታ ላፑን ኪታንቸታሰ ኢሚሰ።

8 ጾሳ ቦንቹዋሬኔ ኢያ ዋልቃሬ ዳንደይሳን ጾሳ ኬላይ ጩያን ኩሚሰ። ላፑን ኪታንቸቲ ኦይኪዳ ላፑን ቦሻቲ ፖሌታና ጋካናው ጾሳ ኬላ ኦኒካ ጌላናው ዳንዳዒቤና።

16

ጾሳ ሃንቆይ ኩሚዳ ፀዓታ

1 ሃሳፌ ጉዬ፣ ጾሳ ኬላፌ ላፑን ኪታንቸታኮ፣ «ቢዲ ጾሳ ሃንቁዋ ላፑን ፀዓታፔ ሳዓን ጉሲቴ» ያጊዲ፣ ኦዲያ ዋልቃማ ቃላ ሲዓሰ።

2 ከይር ኪታንቸይ ቢዲ፣ ባ ፀዓን ዳዒይሳ ሳዓን ጉሲን፣ ደዓ ማላይ ዳዒይሳታ ቦላኔ ኢያ ሚሲሊያ ጎይኒዳይሳታ ቦላ ኢታኔ ዛሚያ ማዲጎላ ኬዪሰ።

3 ናምዓንላ ኪታንቸይ ባ ፀዓን ዳዒይሳ ኣባን ጉሲን፣ ኣባይ ሃይቁዳ ኣሳ ሱላ ዳኒሰ። ቃሲ ኣባን ዳዒያ ሜዴቴላ ኡባይ ሃይቁሰ።

4 ሄዳንላ ኪታንቸይ ባ ፀዓን ዳዒይሳ ሻፋታኒኔ ፑልቶ ሃላታን ጉሲን፣ ሃላቲ ሱላ ጊዲደሶና።

5 ሃሳፌ ጉዬ፣ ሃላ ቦላ ማቲ ዳዒያ ኪታንቸይ ሃይሳዳ ያጊሺን ሲዓሰ።

«ሃዒካ ቤኒካ ዳዒያ ጌሻው፣

ሃይሳዳ ኔ ፐርዲዳ ጊሾ ኔኒ ዓሎ።

6 ኤንቲ ጌሻታ ሱላኔ ናቤታ ሱላ ጉሲዳ ጊሾ

ኤንቲ ሱላ ኡያና ሜላ ኦላዳሳ።

ኤንቲ ባንታው ቤሲያባ ኤኪደሶና»

ያጊሰ።

7 ያርሾ ቤሳፌ፣

«ጎዳው፣ ኡባፌ ዋልቃማ ጾሳው፣

ኔ ፒርዳይ ቱማኔ ዲሎ»
ያጊያ ቃላ ሲባስ።

8 እይዳንሉ ኪታንቸይ ባ ፀዓን ዴዔይሳ አዋ ቦላ ጉሲን፣ አዋይ ባ ሴላን አሳ ፀጋና ሜላ አዋስ ዋልቂ ኢሜቲስ።

9 አሳይ ዋልቃማ ሴላን ፀጌቲዲ፣ ሄ ቦሻታ ቦላ ማቲ ዴዔያ ያሳ ሱንላ ባዲዶሶና፤ ባንታ ናጋራፔ ሲሚዲ ያሳ ቦንቺቦኮና።

10 ኢቻሻንሉ ኪታንቸይ ባ ፀዓን ዴዔይሳ ደዓ አራታ ቦላ ጉሲን፣ ሄ ደዓ ካዋቴላይ ቆሚስ። አሳይ ኡንዓ ጊሾ ባንታ ኢንፃርሳ ሳይሶና።

11 ቃሲ አሳይ ኡንዓ ጊሾኔ ማዲንላ ጊሾ ሳሎ ያሳ ባዲዶሶና፤ ባንታ ኦሴዳ ናጋራፔ ሲሚቦኮና።

12 ኡሱፑንላ ኪታንቸይ ባ ፀዓን ዴዔይሳ ጌታ ኤፊራዲሴ ሻፋን ጉሲን፣ ዶሎሃ ባጋፌ ያና ካዎታስ ኦጌይ ጌጋና ሜላ ሃላይ ሜሊስ።

13 ሄሳፌ ጉዬ፣ ሾጄ ዳኒያ ሄሹ ቱና አያናቲ ዳዊያ ደናፔ፣ ደዓ ደናፔኔ ዋርዶ ናቢያ ደናፔ ኬዪሺን ቤዓስ።

14 ኤንቲ ማላታታ ኦሴያ ቱና አያናታ። ሄ ሄሹ ቱና አያናቲ ኡባፌ ዋልቃማ ያሳ ጌታ ጋላሳን ሃናናው ዴዔያ ኦላስ ሺሻናው አላሜ ካዎታ ኡባኮ ባና።

15 «ሄኮ፣ ታ ካይሶዳ ያና! አሳ ሲንላን ካሎቶናዲኔ ዬላቶናዳ ባርኪዲ፣ ባ ማዑዋ ናጊያ ኡራይ አንጃቲዳይሳ!» ያጊስ።

16 ሄ ቱና አያናቲ ካዎታ ኢብራይስፄ ደናን አርማጌዶኔ ጊያ ቤሳን ሺሺዶሶና።

17 ላፑንላ ኪታንቸይ ባ ፀዓን ዴዔይሳ ጫርኮ ቦላ ጉሲን፣ ያሳ ኬላን ዴዔያ አራታፔ፣ «ፖሌቲስ» ያጊያ ዋልቃማ ቃላይ ዪስ።

18 ሄሳፌ ዋልዓንሳ ዋልዓሚስ፤ ዳዳይ ቆቁስ፣ ቢታይ ቃዲስ። አሲ ሳዓን ሜዴቶሳፔ ቢቲ ሄሳ ሜላ ቃይ ቃዲቤና። ሄሲ ኡባፌ አዲ ቃይ።

19 ጌታ ካታማይ ሄሹ ኬዪዲ ሻኬቲስ፤ ቢታ ኡባን ዴዔያ ካታማቲ ቆዪዶሶና። ያሳይ ጌታ ካታማ ባቢሎኔ ቆፒዲ፣ ባ ኢታ ሃንቆ ዋይኔ ኡሻይ ኩሚዳ ፀዓ ኢው አሚስ።

20 ሃሳን ቱቁቲዳ ቢታቲ ቆዪዶሶና፤ ዴሬቲካ ቤንቲቦኮና።

16:10 ኬሳ 10:21 16:12 አሳ 11:15 16:15 ማቶ 24:43 16:16
2ካዎ 23:29፤ ዛካ 12:11 16:18 ዮ.ቆ 8:5፤ 11:13 16:19 አሳ 51:17
16:20 ዮ.ቆ 6:14

21 አሳ ቦላ ኦይታማኔ ኢቻሹ ከሎ ገራሜ ሜላ ዳዲያ ዋልቃማ ሻቺ ሳሎፔ ቡኪስ። ቦሻይ ዳር ኢታ ገዲያ ገሽ አሳይ ሻቻ ቦሻ ገሽ ያሳ ባዲደሶና።

17

ገታ ላይማቲያ ማጫሲው

1 ላፑን ፀዓታ ኦይኪዳ ላፑን ኪታንቸታፔ ኢሶይ ታኮ ዩዲ፣ «ሃያ፤ ዳር ሃላታ ቦላ ኡቲዳ ገታ ላይማቲያ ማጫሴ ቦላ ያናው ዳዲያ ፒርዳ ታ ኔና ቤሳና።

2 አላሚያ ካዎቲ ኢራ ላይማቲደሶና፤ አላሚን ዳዲያ አሳይካ ኢ ላይማቲፋ ዋይኒያ ኡዩዲ ማሶቲደሶና» ያገሰ።

3 ሄ ኪታንቸይ ታና ጌሻ አያናን ባዘ ቢታ ኤፊስ። ያን ኢሲ ማጫሲያ ጫሻ ሱንላይ ኢ ቦላ ኡባን ፃፊቲዲ ኡቲዳ፣ ዘዎ ደዓ ቶጊዳር ቤዓሰ፤ ሄ ደዓሰ ላፑን ሁዔይኔ ታሙ ካጩይ ዳዲያ።

4 ሄ ማጫሲያ ካሎሴ ማዎኔ ዘዎ ማዎ ማዓሱ፤ ኢያ ዋርቃን፣ ቦንቸ ሹቻኒኔ ኢንቆ ገያ አልዎ ሹቻን አሌቄታሱ። ኢያ ባ ኩሼን ቦርሲያባኔ ላይማቲፋ ቱናቲፋን ኩሚዳ ዋርቃ ፀዓ ኦይካሱ።

5 ኢ ሶሞዎን ፀራ ኦሶ ቢርሼላይ ዳዲያ ሱንላይ፣ «ገታ ባቢሎኔይ፣ ላይማቲፋሲኔ ሳዓን ዳዲያ ቱናባ ኡባሰ አዮ» ያገያ ፀፊይ ፃፊቲዲ ኡቲስ።

6 ቃሲ ሄ ማጫሲያ ጌሻታ ሱላኔ ዩሱሳሰ ማርካቲሼ ሃይቄዳይሳታ ሱላ ኡያዳ ማሶቲዳር ታ ቤዓዳ ማላሌታሰ።

7 ኪታንቸይ ታኮ፣ «ኔኒ አይሰ ማላሌታይ? ታኒ ኔው ማጫሴ ፀራኔ ኢያ ቶኪዳ ላፑን ሁዔይኔ ታሙ ካጩይ ዳዲያ ደዓ ፀራ ኦዳና።

8 ኔኒ ቤዒዳ ደዓይ ኮይር ዳዲያ፣ ሺን ሃዒ ባዎ። ሄ ደዓይ ጪዎ ኦላፊ ኬዩዲ ጳዮሰ ባና። ሳዓይ ሜጴቶሳፔ ደሚዲ፣ ዴዎ ማፃፋን ኤንታ ሱንላይ ፃፊቲቦና ሳዓን ዳዲያ አሳይ ደዓ ቤዒዲ ማላሌታና። ሂዛ፣ ኢ ካሴ ዳዲያ፤ ሃዒ ባዎ፣ ሺን ሲንላፊ ያና።

9 «ሃይሲ ጪንጫቲላኔ አኬካ ኮዩሰ። ላፑን ሁዔቲ ማጫሲያ ኡቲያ ላፑን ዳሬታ፤ ሄሳቲ ቃሲ ላፑን ካዎታ።

10 ኤንታፊ ኢቻሹ ካዎቲ ኩንዲደሶና። ኢሶይ ሃዒ ጋካናው ሃራሰ፤ ሃንኮ ካዎይ ዩቤና። ኢ ዩዲ ጉላ ዎዴ ታካናው ቤሴስ።

16:21 ከሳ 9:23 17:1 ኤር 51:13 17:2 ኢሳ 23:17፤ ኤር 51:7
17:3 ዮ.ቆ 13:1 17:4 ኤር 51:7 17:8 ዳኔ 7:7፤ ዮ.ቆ 11:7፤ ማዘ
69:28

11 ሲንፍ ዳዲ ደዳይ፣ ሃሲ ባይናይሲ፣ ኢ ባ ሁዒን ሆሰፑንላ ደዳ። ኢ ላፑን ደዳታፔ ኢሱዋ፤ ኢ ጳያናው ቤስ።

12 ኔኒ ቤዒዳ ታሙ ካጩቲ ሃሮ ደሚቦና ታሙ ካዎታ። ሺን ኤንቲ ደዳራ ኢሲፌ ኢሲ ሳቴ ካዎቲዲ ሃራናው ኤንታው ማቲ ኢሜታና።

13 ኤንታ ኡባሰ ኢሲ ቆፋይ ዳዔስ፤ ኤንቲ ባንታ ዎልቃኔ ባንታ ማታ ደዳሰ ኢማና።

14 ኤንቲ ደርሳራ ኦሌታና፣ ሺን ደርሳይ ጎዳታ ጎዳኔ ካዎታ ካዎ ጊዲያ ጊሾ ኢ ጃጊዳይሳቲ፣ ደሪዳይሳቲኔ ኦማኔቲዳይሳቲ ሄ ካዎታ ያናና» ያገሰ።

15 ኪታንቸይ ቃሲካ ታኮ፣ «ላይማቲያራ ኡቲዳ ሄ ኔኒ ቤዒዳ ሃላቲ ያራታ፣ ካዎቲላታ፣ ዜሬላታኔ ዲማ ዲማ ደናን ኦዴቲይሳታ።

16 ቃሲ ኔኒ ቤዒዳ ታሙ ካጩይኔ ደዳይ ላይማቲያሮ ኢፃና። ኤንቲ ኢው ዳዒያ ኡባባ ኤካና። ቃሲ ኢዮ ካሎ ኦሻናኔ ኢ ኦሹዎ ማዲጋና፤ ያቲዲ ኤንቲ ኢዮ ታማን ፀጋና።

17 ሂዛ፣ ያሳ ቃላይ ፖሌታና ጋካናው ኤንታ ቆፋይ ኢሲኖ ጊዳና ሜላ ኤንቲ ባንታ ኦይሲያ ዎልቃ ደዳሰ ኢማናዳኔ ያሳይ ቆፒዳይሳ ኤንቲ ኦላናዳ ኤንታ ዎዛናን ያሳይ ኦሞ ዎሊስ።

18 ሄ ኔኒ ቤዒዳ ማጫሲያ ሳዓ ካዎታ ሃሪያ ጌታ ካታሚው» ያገሰ።

18

ባቢሎኔ ኩንዳላ

1 ያቲዲ፣ ጌታ ማቲ ዳዒያ ሃራ ኪታንቸይ ሳሎፔ ዎጲሺን ታ ቤዳስ። ሄ ኪታንቸዎ ቦንቸይ ሳዓ ፖዒሲስ።

2 ሄ ኪታንቸይ ባ ቃላ ጶቁ ኦሊዲ፣ «ኢያ ኩንዳሱ! ጌታ ባቢሎኔይ ኩንዳሱ! ባቢሎኔይ ቱና ኦያናቲ ኦቂያ ቤሲ ጊዳሱ። ዲማ ዲማ ኢታባታሰ ኬሌ ጊዳሱ፤

3 ኦሳ ዜሬሌ ኡባ ባ ላይማቲላ ዎይኒያ ኡሻሱ። ቱና ካፎቲኔ ደዳቲ ሺምፒያ ቤሲ ጊዳሱ። ሳዓ ካዎቲ ኢራ ላይማቲደሶና።

ኢ ሚኮቲላፌ ዳንደይሳን ቢታን ዳዒያ ዛልዓንቸቲ ዲሬቲደሶና»

17:12 ዳኔ 7:24 18:2 ኢሳ 21:9፤ ኤር 51:8፤ ዮ.ቆ 14:8፤ ኢሳ 13:21፤ ኤር 50:39

ያገሰ።

4 ሄሳፌ ጉዬ፣ ታ ሳሎፔ ሃይሳዳ ያገያ ሃራ ቃላ ሲዓሰ።

«ኢ ናጋራ ኢራ ኮዶና ማላኔ፣
ኢያ ኤካናው ዳዒያ ሴራ ሂንቴ ኤኮና ማላ፣
ታ ዳሪያው ኢፔ ከዪቴ።

5 ሂዛ፣ ኢ ናጋራይ ሳሎ ጋካናው ደሬቲስ።
ዶሳይ ኢ ናቁዋ ኣኮኪስ።

6 ኢያ ኢሚዳይሳ ማላ ዛሪዲ ኢው ኢሚቴ።
ኢያ ኦሲዳ ኦሱዋሰ ናምዑ ኩሼ ኢው ዛሪቴ።
ኢያ ገገሲዳ ኡሻ ቦላ ሂንቴ ናምዑ ኩሼ ማላያ ኡሻ ኢ
ፀዓን ኩንሳቴ።

7 ኢያ ቦንቼቲዳይሳዳኔ ኢው ኢንጆቲዳይሳ ማላ፣
ኢዮ ሜቶሲቴኔ ካዮዪቴ።

ኢያ ባ ዋዛናን፣
ጎታኒ ካዋዳ ኡታስ፤ ታ ኣዚኒ ባይና ማጫስ ገዲኬ፤
ታኒ ኡባካ ካዮቲኬ) ያጋሱ።

8 ሄሳ ገሾ፣ ቦሻ ኡባይ፣
ሃርጌይ፣ ካዮይኔ ኮሺ ኢዮ ኢሲ ጋላስ ኦይካና።

ቃሲ ኢያ ታማን ፀጌታና፤
ኣይስ ገኮ፣ ኢ ቦላ ፒርዲያ ዶሳይ ዋልቃማ»

ያገሰ።

9 «ኢራ ላይማቲዳይሳቲኔ ኢ ሚኮቲላን ዳዒዳ፣ ኣላሚያ ካዋቲ
ሄ ካታሚያ ፀጌቲን ኬያ ጨያ ቤዒዳ ዋዳ ኢው ዋሲዲ ዩካና።

10 ኤንቲ ሄ ካታሚ ዋያ ቤዒዲ ያዪዳ ገሾ ሃኪ ኤቁዲ፣
ኖ ገታ ካታሚ! ዋልቃማ ካታሚ!
ባቢሎን፣ ኔና ኣዬ!

ኔኒ ኢሲ ሳቲ ገደን ኔ ፒርዳ ኤካዳሳ) ያጋና።

11 «ኤንታ ማርካቢያ ጫና ሂዛፔ ሻሚያ ኣሲ ባይና ገሾ ሳዓን
ዳዒያ ዛልዓንቸቲ ሄ ካታሚስ ዋሳናኔ ካዮታና።

12 ኤንታ ዋርቃ፣ ቢራ፣ ቦንቸ ሹቻ፣ ኢንቆ ገያ ኣልዶ ሹቻ፣
ካሎሴ ማዶ፣ ሊኖ ማዶ፣ ሃሬ ማዶ፣ ዞዶ ማዶ፣ ዲማ ዲማ ሳዋ
ሚላ፣ ዛላ፣ ኣልዶ ሚላ፣ ናሴ ቢራታ፣ ጎሌ ሹቹ፣

18:3 ኢሳ 23:17፤ ኤር 51:7 18:5 ሜዲ 18:20 18:6 ማዝ 137:8፤ ኤር
50:29 18:8 ኢሳ 47:7-9 18:9 ሂዝ 26:16-17 18:11 ሂዝ 27:31
18:12 ሂዝ 27:12፣ 13፣ 22

13 ቃራ፥ ቁማሜ፥ ኢፃኔ፥ ካርቤ፥ ሺቶ፥ ዎይኔ፥ ዛይቲ፥ ሊቆ ጳሌ፥ ገሰቲ፥ ሜሄ፥ ደርሴ፥ ፓራ፥ ፓራ ጋሬ፥ ኣይሌታኔ ሃራ ኣሳታ ሻሚያ ኦኒካ ባዎ።

14 «ዘልዓንቸቲ ማጫሴኮ፥ ሳኒ ኣሞቲዳ ሎዖባ ኡባይ ኔፔ ጳይሰ። ኔ ኣቆይኔ ኣሌቁቲዳባ ኡባይ ኔፔ ሃኪሰ። ኔኒ ዛራዳ ኤንታ ኡባ ዳማካ) ያገደሶና።

15 ሄ ካታማን ዘልዒዲ ዲሬቲዳ ዘልዓንቸቲ ኢ ሜቱዋ ባቢዲ ኢፔ ሃኪዲ ኤቃና። ኤንቲ ዩካናኔ ካዮታና።

16 ቃሲ፥
«ለኖ ማዖ፥ ካሎሴ ማዖኔ ዘዖ ማዖ ማዓዳ፥
ዎርቃን፥ ቦንቾ ሹቻኒኔ ኢንቆ ገያ ኣልዖ ሹቻን ኣሌቁቲዳ፥
ሄ ገታ ካታሚሰ ኣዩ!

17 ሃይሳ ሜላ ገታ ሻሎ ኡባይ ኢሲ ሳቲ ገደን ጳይሰ) ያገደሶና።

«ማርካቢያ ላገያ ኡባይ፥ ማርካቢያን ቢያ ኡባይ፥ ማርካቢያ ቦላ ኦሴያ ኡባይኔ ኣባን ዘልዒያ ኡባይ ሃኪ ኤቁደሶና።

18 ሄ ካታሚያ ፀጌቲን ኬያ ጩያ ቤዒዳ ዎዴ «ሃ ገታ ካታሚው ዳኒያ ሃራ ካታሚ ዳዒሻ?) ያገደሶና።

19 ኤንቲ ባንታ ሁዒን ባና ቆሊዲ፥ ዋሲደሶናኔ ካዮቲደሶና። ሳባ ቦላ ማርካቤቲ ዳዒያ ኡባይ፥

ኢ ሻሎዋን ዲሬቲዳ ኡባይ፥
ሄ ካታሚያ ኢሲ ሳቲን ጳዩዳ ገሾ
ኣዩ! ኣዩ!

20 ሳሎዎው፥ ኢ ጳዩዋን ኡፋይታ!
ጌሻቶ፥ ሃዋሬቶ፥ ናቤቶ፥

ዖሳይ ሃንቲ ገሾ ኢ ቦላ ፒርዲዳ ገሾ ኡፋይቲቲ።» ያገደሶና።»

21 ያቲን፥ ሚኖ ኪታንቸይ ዎፃ ዳኒያ ገታ ሹቹ ዳንሲዲ ኣባን ሆሊሹ፥ «ገታ ካታሚያ ባቢሎኔይ ዎልቃን ሆሌታዳ ሃይሳዳ ኩንዳና፤ ኢያ ሃቸፌ ጉዬ ኡባካ ቤንቲኩ።

22 ዲሊ ዲጃይሳቲኔ ዩጃይሳቲ፥ ሱሱልዔኔ ሞይዜ ፑኔይሳቲ፥ ሂዛፔ ጉዬ ኔ ገደን ኡባካ ሰዔቶኮና። ኣይ ኮቻ ዘልዒ ዘልዒያ ኣሲካ ኔ ገደን ቤንቲና። ዎፃ ገርሲ ሂዛፔ ጉዬ ኔ ገደን ሰዔቲና።

18:15 ሂዛ 27:31 18:17 ኢሳ 23:14፤ ሂዛ 27:26 18:18 ሂዛ 27:32
18:20 ሂዛ 27:30፤ ዛሬ 32:43፤ ኤር 51:48 18:21 ኤር 51:63 18:22
ኢሳ 24:8፤ ሂዛ 26:13 18:22 ኤር 7:34፤ 25:10

23 የምፔ ፖዖይ ዛሪዲ ኔ ጊደን ፖዔና። ማቾ ኤኬይሳኔ አዚና ጌሊያሪ ቃሊ ሂዛፔ ጉዬ ኔ ጊደን ሲዔቴና። ኔ ዛለባንቾቲ ቢታ ኡባን ኤሬቲዳ ዋልቃማታ። ኔ ቢታን ካዋቴላታ ኡባ ጨማዳሳ» ያጊሰ።

24 ናቤታ ሱላይ፣ ጌሻታ ሱላይኔ ቢታ ቦላ ሃይቂዳ አሳ ኡባ ሱላይ ኢ ጊደን ቤንቲዳ ጊሾ ባቢሎኔይ ፐርዴታሱ።

19

1 ያቲን፣ ሳሎን ዳር አሳይ፣
«የሳይ ጋላቴቶ!

አቶቴላይ፣ ቦንቾይኔ ዋልቃይ ኑ የሳሰ ጊደ።

2 ኢያ ፐርዳይ ቱማኔ ዒሎ።

ሳዓ ቱኒሲዳ ኢታ ላይሚው የሳይ ፐርዲሰ።

የሳይ ባ አይሌታ ሱላ ኢፔ አቺሰ»
ያጊሺን ሲዓሰ።

3 ሄ አሳይ ዛሪዲ ባንታ ቃላ ቶቁ ኦሊዲ፣

«የሳ ጋላቲ ጋኮ።

ሄ ካታሚያ ሜሪናው ጨያሽ ዳና»

ያጊደሶና።

4 ለታማኔ አይዱ ጨማቲኔ ዴጎን ዴዒያ አይዱ ሜጴቴላቲ አራታን ኡቲዳ የሳሰ ጉፋኒዲ፣

«አሚንዒ! የሳ ጋላቲ ጋኮ»

ያጊዲ ሳይኒደሶና።

5 ያቲን፣

«የሳ አይሌቲ፣

የሴ ያያ ጉሊኔ ጊቲ ኡባይ፣

ኑ የሳ ጋላቲቴ»

ያጊያ ቃላይ አራታፔ ኬዩሰ።

6 ያቲን፣ ዳር አሳዳ ዋጫሚያ፣ ዋልቃማ ሻፋዳ ጉሚያ፣ ዳዳዳ ዴቺያ ጊርሳይ፣

«የሳ ጋላቲ ጋኮ፤

ኑ ጎዳይ፣ ኡባፌ ዋልቃማ የሳይ ካዋቲሰ።

7 ዶርሳ ያጋኖይ ጋኪዳ ጊሾኔ ኢያ ጌሊያሪ ጊቢዳ ጊሾ

18:24 ኤር 51:49 19:2 ዛሬ 32:43፤ 2ካዎ 9:7 19:3 ኢሳ 34:10
19:5 ማዝ 115:13 19:6 ሂዝ 1:24፤ ማዝ 93:1፤ 97:1፤ 99:1

ኑ ኡፋይቶስ፣ ጋላቶሲኔ ደርሳ ቦንቾስ።

8 ጌሎስ ጊሊዳራ ጳሊያኔ ጌሺ ጊዲዳ ሊኖ ማዖ ማዖና ሜላ ኢው ኢሜተስ» ያጊሺን ታ ሲዓስ። (ሊኖ ማዖይ ጌሻታ ዲሎ ኦሶ ለሚሶ።)

9 ሃሳፌ ጉዬ፣ ኪታንቾይ ታኮ፣ «ደርሳ ያጋኑዋ ያጌቲዳይሳቲ ኦንጃቲዳይሳታ» ጋዳ ፃፋ። ሄ ኪታንቾይ ጉጂዲ፣ «ሃይሲ ያሳ ቱማ ቃላ» ያጊሰ።

10 ሄ ዋዴ ታ ኢያ ጎይናናው ኢያ ቶሁዋ ቦላ ኩንዳስ። ሺን ኢ፣ «ሄሳ ኦሶፋ! ታኒ ዬሱሳባ ማርካቲያ ኔ ሜላኔ ኔ ኢሻታ ሜላ። ኔ ያሳ ጎይና» ያጊሰ። ሂዛ፣ ዬሱሳባ ማርካቲዳይሳታስ ናቤቴላ ኦያኒ ዴዔስ።

ቦላ ፓራ ቶጊዳይሳ

11 ያቲን፣ ሳሎይ ዶዬቲን፣ ያን ቦላ ፓሪ ዴዔይሳ ቤዓስ። ሄ ፓራ ቶጊዳይሲ ኦሚኔቲዳይሳኔ ቱማንቾ ጌቴቴስ። ኢ ዲሎቴላን ፐርዴሲኔ ኦሎቴስ።

12 ኢያ ኦይፌይ ታማ ላጮ ዳኔስ፤ ኢያ ሁዔን ዳር ካላቺ ዴዔስ። ኢያ ቦላ ኢ ኦቲን ሃሪ ኦኒካ ኤሮና ፃፌቲዳ ሱንሳ ዴዔስ።

13 ኢ ሱላን ሙኬቲዳ ማዖ ማዒስ፤ ኢያ ሱንሳይካ ያሳ ቃላ።

14 ጳሊያኔ ጌሺ ጊዲዳ ሊኖ ማዖ ማዒዳ ሳሎ ኦላንቾቲ ቦላ ፓራታ ቶጊዲ ኢያ ጌዶ ካሎሶና።

15 ካዎቴላታ ቃንዲያ ማሺ ኢያ ደናፔ ከዬስ። ኢ ቢራታ ፃሞዓን ኦሳ ሃራና። ኡባፌ ዋልቃማ ያሳ ሃንቆ ዋይኔ ኡሻ ጉምዒያ ቤሳ ኢ ዬዳና።

16 ኢያ ማዑዋ ቦላኔ ኢያ ዋዲሪያ ቦላ፣ «ካዎታ ካዉዋኔ ጎዳታ ጎዳ» ያጊያ ሱንሳይ ፃፌቲስ።

17 ሃሳፌ ጉዬ፣ ኢሲ ኪታንቾይ ኦዋ ቦላ ኤቂዳይሳ ቤዓስ። ሄ ኪታንቾይ ሳሎራ ፐራዲያ ካፎ ኡባስ ባ ቃላ ቶቁ ኦሲዲ፣ «ሃ ዪቴ! ያሳ ጊቢራ ማናው ኢሲ ቤሲ ሸቂቱ።

18 ዪዲ ካዎታ ኦሹዋ፣ ሻላቃታ ኦሹዋ፣ ዎታዳሬታ ኦሹዋ፣ ፓራታ ኦሹዋ፣ ፓራታ ቶጌይሳታ ኦሹዋ፣ ኦሳ ኡባ ኦሹዋ፣ ኦይሌታ ኦሹዋ፣ ዎማናታ ኦሹዋ፣ ጊታታኔ ጉላታ ኦሹዋ ሚቴ» ያጊሰ።

19:9 ማቶ 22:2 19:11 ሃዝ 1:1 19:12 ዳኔ 10:6 19:15 ማዝ 2:9፤ ኢሳ 63:3፤ ኢዩ 3:13፤ ዮ.ቆ 14:20 19:17 ሃዝ 39:17-20

19 ደዓይ፣ ፓራ ቶጊዳይሳራኔ ኢያ ኦላንቸታራ ኦሌታናው ሳዓ ካዎቲኔ ኤንታ ኦላንቸቲ ኢሲ ቤሲ ሸቄዳሺን ቤዓስ።

20 ሺን ሄ ደዓይኔ ኢያ ሱንፋን ማላታታ ኦሌዳ ዋርዶ ናቤይ ኢያራ ኢሲፌ ኦይኬቲስ። ሄ ማላታታን ደዓ ማላይ ዴዔይሳታኔ ኢያ ሚሲሊያ ጎይኔይሳታ ኢ ባሌሊስ። ደዓይኔ ዋርዶ ናቤይ ናምዓይካ ዲኔን ኤዲያ ታማ ኣባን ፓፃ ዩጌቲደሶና።

21 ኣቲዳይሳቲ ፓራ ቶጊዳይሳ ደናፔ ኬያ ማሻን ሃይቂደሶና። ካፎቲ ኡባይ ኤንታ ኣሹዋ ሚዲ ካሊደሶና።

20

ሙኩሉ ላይሊ

1 ዛዊ ባይና ኦላ ቁልፒያኔ ጌታ ሳንፋላታ ባ ኩሸን ኦይኪዳ ኢሲ ኪታንቸይ ሳሎፔ ዋዲሺን ቤዓስ።

2 ኢ ዳዊያ ኦይኪዲ ሙኩሉ ላይሊስ ቃቸስ። ሄ ዳዊይ ኮይሮ ሸሻ፣ ዳቡሎሳ ዋይኮ ፃላሄ።

3 ኪታንቸይ ዛዊ ባይና ኦላን ኢያ ዩጊዲ፣ ሙኩሉ ላይሊ ዉራና ጋካናው ካዎቲፋታ ዛሪ ባሌሶና ማላ ቁልፒን ጎርዲዲ ኣታሚስ። ሄሳፌ ጉዬ፣ ዳዊይ ጉላ ዋዴስ ቢሌታናው ቤሴስ።

4 ሄሳፌ ጉዬ፣ ኣራታታኔ ኣራታታ ቦላ ኡቲዲ ፐርዳና ማላ ማቲ ኢማቲዳይሳታ ቤዓስ። ዩሱሳስ ማርካቲዳ ጊሾኔ ያሳ ቃላ ኦዲዳ ጊሾ ባንታ ቆዲያ ጎይሬቲዳ ኣሳ ሸምፑዋ ቤዓስ። ኤንቲ ደዓ ዋይኮ ደዓ ሚሲሊያ ጎይኒቦኮና። ኤንቲ ደዓ ማላ ባንታ ሶምፆን ዋይኮ ባንታ ኩሸን ዋሊቦኮና። ኤንቲ ሃይቆፔ ዴንዲዲ ኪሪስቶሳራ ኢሲፌ ሙኩሉ ላይሊ ሃሪደሶና።

5 ሃይሲ ኮይሮ ዴንዲዋ፤ ኣቲዳ ሃንኮ ሃይቂዳይሳቲ ሙኩሉ ላይሊ ዉራና ጋካናው ሃይቆፔ ዴንዲቦኮና።

6 ኮይሮ ዴንዲዋስ ቃዲ ዴዔይሳቲ ኣንጃቲዳይሳታኔ ጌሻታ። ኤንታ ቦላ ናምዓንፉ ሃይቁዋስ ዋልቂ ባዋ። ኤንቲ ያሳሲኔ ኪሪስቶሳስ ካሄኔ ጊዳና፤ ኢያራ ኢሲፌ ሙኩሉ ላይሊ ሃራና።

ፃላሄያ ያኔቲላ

7 ሙኩሉ ላይሊ ዉራዳፔ ጉዬ ፃላሄይ ቃሾፔ ቢሌታና።

8 ኢ ሳዓ ጋፃፔ ጋፃ ጋካናው ዴዔያ ካዎቲፋታ፣ ኤንቲካ፣ ጎጌኔ ማጎጌ ጌቲቲይሳታ ባሌሊዲ ኦላስ ሺሻናው ኬያና። ኤንታ ፓይደይ ኣባ ጋፃን ዴዔያ ሻፌ ማላ።

9 ከንቲ ቢታ ኡባን ላሌቲዲ፡ ጌሻታ ሄራኔ ያሳይ ደሲያ ካታማ ቲቁደሶና። ሺን ታሚ ሳሎፔ ዋዲዲ ከንታና ሚሰ።

10 ከንታ ባሌሊዲ ፃላሄይ፡ ደዓይኔ ዋርደ ናቤይ ዩጌቲዳ ኤዲያ ዲኔ ታማ ኣባን ዩጌቲሰ። ከንቲ ቃማኔ ጋላሰ ሜሪናው ፓፃ ካዔታና።

ዉርሴላ ፐርዳ

11 ሄሳፌ ጉዩ፡ ጌታ ቦላ ኣራታ ቦላ ኡቲዳይሳ ቤዓሰ። ሳዒኔ ሳሎይ ኢያ ሲንላፌ ባቃቲደሶና፤ ከንቲ ዛሪ ቤንቲቦኮና።

12 ሃይቁዳይሳቲ፡ ጌታቲኔ ጉላቲ ኣራታ ሲንላን ኡቁዳይሳታ ቤዓሰ፤ ማፃፋቲ ደዩቲደሶና፤ ቃሲ ዴፆ ማፃፋ ጌዲዳ ሃራ ማፃፊ ደዩቲሰ። ሃይቁዳይሳቲ ማፃፋን ፃፌቲዳ ባንታ ኦሱዋዳ ፐርዳ ኤኪደሶና።

13 ኣባይ ባ ጌደን ዴዒያ ሃይቁዳይሳታ ኢሚሰ፤ ሃይቆይኔ ሲፆሌይ ባንታ ጌደን ዴዒያ ሃይቁዳይሳታ ኢሚደሶና። ኢሲ ኢሲ ኣሲ ባ ኦሱዋዳ ፐርዳ ኤኪሰ።

14 ያቲን፡ ሃይቆይኔ ሲፆሌይ ታማ ኣባን ዩጌቲደሶና። ሄ ታማ ኣባይ ናምዓንሳ ሃይቆ።

15 ዴፆ ማፃፋን ኢያ ሱንላይ ፃፌቲቦና ኦኒካ ታማ ኣባን ዩጌቲሰ።

21

ኦራላ ሳሎኔ ኦራላ ሳዓ

1 ታኒ ኦራላ ሳሎኔ ኦራላ ሳዓ ቤዓሰ። ኮይር ሳሎይኔ ኮይር ሳዓይ ቋይሰ፤ ኣባይካ ቋይሰ።

2 ጌሻ ካታሚያ፡ ኦራላ ዩራሳላሚይ፡ ኣዚና ጌላናው ኣሌቁታዳ ጌጋዳ ዴዒያ ማጫሳዳ ሳሎፔ ያሳ ማታፔ ዲጌ ዋዲሺን ቤዓሰ።

3 ኣራታፔ ሃይሳዳ ያጌዲ፡ ኦዲያ ጌታ ቃላ ሲዓሰ፤ «ያሳ ከላይ ኣሳራ ዴዔሰ፤ ያሳይ ባ ቦንቹዋራ ኣሳራ ኢሲፌ ዳና። ከንቲ ኢያ ዴፌ ጌዳና፤ ያሳይ ባ ሁዔን ከንታራ ዳና፤ ኢ ከንታ ያሳ ጌዳና።

4 ያሳይ ከንታ ኣይፌፔ ኣፋላ ኡባ ቁቻና። ሂዛፔ ሃይቆይ ዋይኮ ካዮይ ዋይኮ ዋሶይ ዋይኮ ዋይይ ዳና። ጋልሳ ኡባይ ኣዲሰ» ያጌሰ።

20:11 ዳኔ 7:9-10 21:1 ኢሳ 65:17፤ 66:22፤ 2ጴፃ 3:13 21:2 ኢሳ 52:1፤ ዮ.ቆ 3:12፤ ኢሳ 61:10 21:3 ሂዝ 37:27፤ ሉዋ 26:11 21:4 ኢሳ 25:8፤ ኢሳ 35:10፤ 65:19

5 አራታ ቦላ ኡቲዳይሲ፡ «ታኒ ኡባ ኦራሊ ኦላና» ያገሰ። ቃሲ ዛሪዲ ታኮ፡ «ታኒ ኦዳይሲ አማንሌይሳኔ ቱማ ጊዲያ ገሾ ፩።» ያገሰ።

6 ቃሲ ታኮ፡ «ፖሌቲስ! ታኒ አልፋኔ አሜጋ፤ ዶሜሊኔ ፖሎ። ሳሞቲዳ ኦናካ ዴያ ሃላ ፑልቱዋሬ ጩጊ ባይና ጮ ኡሻና።»

7 ያኒያ ኦኒካ ሄሳ ኡባ ላታና፤ ታኒ ኢያው ያሳ ጊዳና፤ አካ ታ ናዓ ጊዳና።

8 ሺን ያሻንቸታ፡ አማኔቶናይሳታ፡ ቱናታ፡ ሸምፖ ዋዲይሳታ፡ ላይማቴይሳታ፡ ቢቴይሳታ፡ ኤቃ ጎይኔይሳታኔ ዋርዳንቸታ ቃዳይ ዲኔይ ኤዲያ ታማ አባን ጊዳና። ሄሲ ናምዓንላ ሃይቆ» ያገሰ።

9 ላፑን ዉርሴላ ቦሻቲ ኩሚዳ ላፑን ፀዓታ ኦይኪዳ ላፑን ኪታንቸታ፤ ኢሶይ ታኮ ዪዲ፡ «ሃያ፡ ታኒ ኔና ጌሎስ ገጊዳ ዶርሳ ማቸው ቤሳና» ያገሰ።

10 ኪታንቸይ ታና ዳር ቶቃ ዳሪያ ሁዔ ጌሻ አያናን ኬሲዲ፡ ጌሻ ካታማይ፡ ዬሩሳላሜይ፡ ሳሎፔ ያሳ ማታፔ ዲጌ ዋዲሺን ቤሲስ።

11 ሄ ካታማይ ያሳ ቦንቸን ፖዔስ። ሄ ካታማ ፖያይ ያስጸዴ ጊያ አልዎ ሹቻ ማላ፤ ጌሻ ቢሪሌዳ ጸሌስ።

12 ሄ ካታማ ዲርሳይ ዋልቃማኔ አዲሴ። ኢያው ታማኔ ናምዑ ፔንጌቲኔ ሄ ፔንጌታ ናጊያ ታማኔ ናምዑ ኪታንቸቲ ዳዎሶና። ፔንጌታ ቦላ ታማኔ ናምዑ ኢስራዔል ዜሬላታ ሱንላይ ፃፌቲስ።

13 ዶሎሃ ባጋራ ሄዡ ፔንጌቲ፡ ፑዴሃ ባጋራ ሄዡ ፔንጌቲ፡ ዲጌሃ ባጋራ ሄዡ ፔንጌቲኔ ዉሎሃ ባጋራ ሄዡ ፔንጌቲ ዳዎሶና።

14 ካታማ ገምቤ ዲርሳይ ታማኔ ናምዑ ሹቻ ባሶታ ቦላ ኤቂስ። ኤንታ ቦላ ታማኔ ናምዑ ዶርሳ ሃዋራታ ሱንላይ ፃፌቲስ።

15 ታው ኦዲያ ኪታንቸዋስ፡ ካታማ፡ ኢያ ፔንጌታኔ ኢያ ዲርሳ ዋዲያ ዋርቃ ፃምዓይ ዳዔስ።

16 ካታማስ ኦይዲ ማዛኔቲ ዳዎሶና፤ ካታማ ጌሳይኔ ጎምፓይ ኢሲ ገና። ኪታንቸይ ካታማ ባ ፃምዓን ዋዲን፡ ካታማይ ታማኔ ናምዑ ሙኩሉ ኪሎ ሚቲሬ ጊዲስ፤ ካታማ ጌሳይ፡ ጎምፓይኔ ቶቃቲላይ ኢሲ ገና።

17 ኪታንቸይ ቃሲ ዲርሳ ዋዲን፡ ኪታንቸይ ጎዔቲያ አሳ ኩሼን ኢሲ ፃታኔ ኦይታማኔ ኦይዲ ዋዲ ጊዲስ።

21:6 እሳ 55:1 21:7 2ሳሙ 7:14፤ ማዝ 89:26 21:10 ሂዝ 40:1
21:12 ሂዝ 48:30-35 21:15 ሂዝ 40:3

18 ካታማ ዲርሳይ ያሰጸዱ ጊያ ሹቻን ዲሬተስ። ካታማይ ማስቶቲዳ ጳሊያ ጌሻ ዋርቃን ኮሴተስ።

19 ካታማ ዲርሳ ባሶይ ኡባ ቆሞ ቦንቼተዳ ሹቻን አሌቄተስ። ኮይሮ ሃፃተዳ ሹቻይ ያሰጸዱ፣ ናሞዓንላይ ሳሞፔሬ፣ ሃሻንላይ ኬልቄዶኔ፣ ኦይዳንላይ ባሉሬ።

20 ኢቻሻንላይ ሳርዶንኪሴ፣ ኡሱፑንላይ ሳርዲዮኔ፣ ላፑንላይ ኪሪስተሎቤ፣ ሆስፑንላይ ቢሪሌ፣ ኡዱፋንላይ ቶጳዚዮኔ፣ ታማንላይ ኪሪስጲራሲሴ፣ ታማኔ ኢሲንላይ ያከንቴ፣ ታማኔ ናሞዓንላይ አሚቴስዲኖሴ።

21 ታማኔ ናሞዑ ፔንጌታስ ታማኔ ናሞዑ አንቆ ጊያ አልዖ ሹቹ ዴዔስ። ኢሲ ኢሲ ፔንጌይ ኢሲ አንቆን ኮሴተስ። ካታማ ዋጋ ኦጌይ ማስቶቲዳ ጳሊያ ጌሻ ዋርቃፊ ኮሴተስ።

22 ጎዳይ፣ ኡባፊ ዋልቃማ ያሳይኔ ደርሳይ ካታማስ ኬሌ ጊዲያ ጊሾ ታ ሄ ካታማን ያሳ ኬሌ ቤዓቢኩ።

23 ያሳ ቦንቻይ ሄ ካታማስ ፖዒያ ጊሾኔ ደርሳይ ኢያው ያምፔ ጊዲያ ጊሾ ካታማስ አዋ ዋይኮ አጌና ፖዖ ኮሾና።

24 ካዋቲላቲ ሄ ካታማ ፖዖን ሃሙታና፤ ካዋቲካ ባንታ ቦንቻዋ ያ ኤሃና።

25 ቃሚ ያን ባይና ጊሾ ካታማ ፔንጌቲ ኡባ ዋዴ ደያ ጊዳና፤ ጎርዴቶኮና።

26 ካዋቲላታ ጌታቲላይኔ ቦንቻይ ሄ ካታማ ያና።

27 ደርሳ ዴዖ ማፃፋን ሱንላይ ፃፊቲዳይሳታ ፃላሊ አቲን ቱናባ ዋይኮ ዬላያባ ኦሌይ ዋይኮ ዋርዶቲይ ኦኒካ ሄ ካታማ ጌሌና።

22

1 ያቲዲ፣ ኪታንቻይ ታና ያሳ ካዋቲላ አራታፔኔ ደርሳ ካዋቲላ አራታፔ ጎጊያ ማስቶቲዳ ጳሊያ ዴዖ ሃላ ሻፋ ቤሲስ።

2 ሄ ሻፋይ ካታማ ኦጊያ ጊደራ ዲጌ ጎጌስ። ሻፋፔ ሄፊንላ ባጋራኔ ሃፊንላ ባጋራ አጌናን ኢሲ ቶሆ፤ ላይላን ታማኔ ናሞዑ ቶሆ አይፊያ ዴዖ ሚሊ ዴዔስ። ሄ ሚላ ቦንጮይ ካዋቲላታ ኡባ ሃርጌፊ ፓሴስ።

21:21 እሳ 54:11-12 21:23 እሳ 60:19 21:24 እሳ 60:3 21:25 እሳ 60:11 21:27 እሳ 52:1፤ ሂዝ 44:9 22:1 ሂዝ 47:1፤ ዛካ 14:8
22:2 ሜዴ 2:9

3 ሄ ካታማን አይቢ ቃንጌሊካ ዳና። ያሳ ካዎቴላ አራታይኔ ደርሳ ካዎቴላ አራታይ ሄ ካታማን ዳና። ያሳ አይሌቲ ያሳሰ አላና።

4 ኤንቲ ኢያ ሰሞዑዋ ቤዓና፤ ኢያ ሱንሳይ ኤንታ ሰሞዖን ፃፊታና።

5 ሂዛፔ ቃሚ ዳና፤ ጎዳ ያሳይ ኤንታው ያሞፔ ጊዲያ ጊሾ ኤንታው ያሞፔ ዋይኮ አዋ ፖዖ ኮሼና። ኤንቲ ሜሪ ሜሪናው ካዎታና።

ዬሱሳ ዩሳ

6 ኪታንቸይ ታኮ። «ሃ ታ ኦዲያ ቃላይ ቱማኔ አማንሌይሳ። ጎዳይ፣ ናቤታ ባ ጌሻ አያናን ከቲያ ያሳይ፣ ማታን ሃናናባ ባ አይሌታ ቤሳናው ባ ኪታንቸዋ ከቲሰ» ያገሰ።

7 ዬሱሲ። «ሄኮ ታ ኤሌሳዳ ያና፤ ሃ ማፃፋን ዳዲያ ቲንቢቲ ቃላ ናገያ ኦኒካ አንጃቲዳይሳ» ያገሰ።

8 ታኒ። የሃኒሲ። ሄ ኡባባ ሲዓሰ፤ ቤዓሰ። ታኒ ሄሳ ሲዒዳ ዋዴኔ ቤዒዳ ዋዴ ሄሳ ታና ቤሲዳ ኪታንቸዋ ጎይናናው ኢያ ቶሁዋ ቦላ ኩንዳሰ።

9 ሺን ኪታንቸይ ታኮ። «ሄሳ ኦሶፋ! ታኒ ኔዳ፣ ናቤታዳ ኔ አሻታዳኔ ሃ ማፃፋን ዳዲያ ኡባ ከቲቲያ አይሌታ ሜላ፤ ያሳ ጎይና» ያገሰ።

10 ኪታንቸይ ዛሪዲ። «ሃ ኡባይ ፖሌቲያ ዋዴይ ማታቲዳ ጊሾ ሃ ማፃፋን ፃፊቲዳ ቲንቢቲ ቃላ ማታሜን ጎርዶፋ።

11 ኢታ ኦሌይ ጉጂዲ ኢታ ኦሶ፤ ቱኔይ ጉጂዲ ቱኖ። ሎዖ ኦሌይ ጉጂዲ ሎዖ ኦሶ፤ ጌዬይ ጉጂዲ ጌዮ» ያገሰ።

12 ዬሱሲ። «ሄኮ፣ ታኒ ኤሌሳዳ ያና። ኢሱዋሰ ኢሱዋሰ ኢያ ኦሱዋዳ አማናው ታ ዋይቶይ ታራ ዳዒሰ።

13 ታኒ አልፋኔ አሜጋ፤ ኮይሮኔ ወርሱሌ፤ ደሜሊኔ ፖሎ።

14 «ባንታ ማዑዋ ሜጪዲ ጌሼይሳቲ አንጃቲዳይሳታ። ዴዖ ሚሌ አይፊያ ማናዉኔ ካታማ ፔንጊያራ ጌላናው ኤንታው ማቲ አሜቲሰ።

15 ሺን ካናቲ፣ ቢቲይሳቲ፣ ላይማቲይሳቲ፣ ሺሞፖ ዋዴይሳቲ፣ ኤቃ ጎይኔይሳቲ፣ ዋርዶ ደሴይሳቲኔ ኦሌይሳቲ ካሬን ዴዖሶና።

22:3 ዛካ 14:10 22:5 ኢሳ 60:19፤ ዳኔ 7:18 22:11 ዳኔ 12:10
22:12 ኢሳ 40:10፤ 62:11፤ ማዝ 28:4፤ ኤር 17:10 22:13 ዮ.ቆ 1:8፣ 17፣
2:8፤ ኢሳ 44:6፤ 48:12 22:14 ሜዴ 2:9፤ 3:22

16 «ታኒ፣ ዩሱሲ፣ ሃ ማርካቴፋ ሂንቴው፣ ዋሳ ኬፋታሰ ኦዳና ማላ ታ ኪታንቸዋ ኪታሰ። ታኒ ዳዊቴ ሼሺኔ ዜሬሌ። ታኒ ፖሊያ ጉራ ባካላ» ያገሰ።

17 ጌሻ አያናይኔ ጌላናው ገጊዳ ማጫሲያ፣ «ሃያ» ያጎሰና። ቃሲ ሃይሳ ሲሊያ ኦኒካ፣ «ሃያ» ያጎ። ሳሞቴዳ ኦኒካ ሃዮ፤ ዴዎ ሃፋ ኮያ ኦኒካ ጮ ኤኮ።

18 ታኒ ሃ ማፃፋን ፃፊቴዳ ቲንቢቴ ቃላ ሲሊያ ኦናካ ዘራይሰ። ኦኒካ ሃ ቃላ ቦላ ኢሲባ ጉጂኮ፣ ያሳይ ሃ ማፃፋን ፃፊቴዳ ቦሻ ኢያ ቦላ ጉጂና።

19 ኦኒካ ማፃፋን ዴሊያ ቲንቢቴ ቃላፔ ኢሲባ ፓጪሲኮ፣ ያሳይ ሃ ማፃፋን ፃፊቴዳ ዴዎ ሚፋ ኣይፊያፔኔ ጌሻ ካታማፔ ኢያ ቃዳ ፓጪሳና።

20 ሃ ኡባ ማርካቴይሲ፣ «ቴማ፣ ታኒ ኤሌሳዳ ያና» ያገሰ። አሚንዒ፣ ጎዳ ዩሱሳ፣ ሃያ።

21 ጎዳ ዩሱሰ ኪሪሰቶሳ ኣጼ ኬሃቴፋይ ሂንቴ ኡባራ ገዶ። አሚንዒ።

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source
files dated 29 Jan 2022

c35d6c73-3843-5482-b53e-7559d35deee5